




Cynllun Gwaith arfaethedig Ofcom 2025/26

Sicrhau bod cyfathrebiadau'n gweithio i
bawb

Ymgynghoriad

Cyhoeddwyd 04 Rhagfyr 2024

Dyddiad cau ar gyfer derbyn ymatebion: 29 Ionawr 2025



Cynnwys

Adran

1. Trosolwg	3
2. Ein blaenoriaethau ar gyfer 2025/26	6
3. Gwledydd.....	22
4. Sut rydym yn cyflawni	26
A1. Beth rydym yn ei wneud.....	33
A2. Atodiad i'r Prosiect	36
A3. Asesiad effaith	48
A4. Ymateb i'r ymgynghoriad hwn	49
A5. Egwyddorion ymgynghori Ofcom	52
A6. Dalen gyflwyno'r ymgynghoriad.....	53

1. Trosolwg

- 1.1 Fel rheoleiddiwr cyfathrebiadau cydgyfeiriol y DU, mae Ofcom yn gweithio gyda diwydiannau sydd â thechnoleg wrth eu calon. Mae'r rhain yn sectorau sydd wedi sbarduno arloesedd a thwf economaidd sylweddol dros ddegawdau lawer. Mae ein dull rheoleiddio wedi ceisio meithrin a chefnogi twf a tharfu, gan gredu mai cystadleuaeth am syniadau yn ogystal â marchnadoedd yw'r ffordd iawn o sicrhau canlyniadau cynaliadwy i ddinasyddion, defnyddwyr a'r economi.
- 1.2 Mae gennym rôl i'w chwarae yn esblygiad rhwydweithiau a gwasanaethau, o ddarparu sbectrwm ar gyfer band eang lloeren a symudol, i helpu pobl i fyw bywydau mwy diogel mewn byd ar-lein gyda Deallusrwydd Artiffisial a chynnwys a gynhrychir ganddo.
- 1.3 Mae'r Cynllun hwn yn nodi'r gwaith y byddwn yn ei wneud yn 2025/26 tuag at ein cenhadaeth i sicrhau bod cyfathrebiadau'n gweithio i bawb, a sut byddwn yn cyflawni.

Ein sectorau

- 1.4 Mae rhwydweithiau diogel a dibynadwy yn ganolog i bob agwedd ar ein bywydau digidol ac yn sbardun allweddol ar gyfer twf economaidd. Roedd ein hadroddiad [Cysylltu'r Gwledydd](#) diweddaraf yn dangos bod band eang sy'n gallu delio â gigabits bellach ar gael i hyd at 24.0 miliwn o gartrefi (80% o holl gartrefi'r DU). Byddwn yn parhau i gefnogi buddsoddiad mewn rhwydweithiau drwy ein Hadolygiad o Fynediad Telegyfathrebiadau a fydd yn darparu sicrwydd rheoleiddio ar gyfer y pum mlynedd o fis Ebrill 2026 ymlaen, fel rhan o'r strategaeth 10 mlynedd a nodwyd gennym yn 2021.
- 1.5 Mewn tirwedd cyfryngau sy'n newid, rydym am i gynulleidfaoedd barhau i ganfod a chyrchu cynnwys dibynadwy, sy'n cael ei werthfawrogi. Eleni, am y tro cyntaf, [roedd mwy o oedolion yn gwylio newyddion ar-lein nag ar y teledu](#), ac [erbyn hyn mae dros hanner ohonom yn cael ein newyddion drwy gyfryngau cymdeithasol](#). Yn 2024, fe waeth y Ddeddf Cyfryngau – y diweddariad mawr cyntaf i ddeddfwriaeth y DU yn y maes hwn mewn dros 20 mlynedd – fwrw ymlaen â nifer o argymhellion pwysig yn ein hadroddiad 2021, '[Sgrin Fach: Trafodaeth Fawr](#)', adolygiad o Gyfryngau Gwasanaeth Cyhoeddus, gan gynnwys cynigion ynghylch amlygrwydd cyfryngau gwasanaeth cyhoeddus. Rydym nawr yn gweithredu'r Ddeddf Cyfryngau, gan ddiweddarau ein rheolau ochr yn ochr ag ystyried a oes angen rhagor o ddiwygio drwy ein hadolygiad cyfryngau gwasanaeth cyhoeddus nesaf, gyda'n canfyddiadau i'w cyhoeddi yn ystod haf 2025.
- 1.6 Eleni hefyd yw blwyddyn lawn gyntaf Ofcom fel rheoleiddiwr diogelwch ar-lein y DU, gyda rheolau newydd yn dod i rym o Ragfyr 2024 ymlaen. Yn hwyrach y mis hwn, byddwn yn cyhoeddi'r rheolau terfynol ar niwed anghyfreithlon ac yn canolbwyntio ar wasanaethau: bydd eu dyletswyddau'n dechrau dod i rym o'r flwyddyn newydd ymlaen, a byddwn yn disgwyl iddynt weithredu'n gyflym i sicrhau newidiadau i ddefnyddwyr. Erbyn y gwanwyn, byddwn wedi cwblhau'r mesurau i amddiffyn plant a chyhoeddi ein Codau Ymarfer Amddiffyn Plant terfynol, yn ogystal â chwblhau ein canllawiau i ddarparwyr cynnwys pornograffig. Ar ôl i'r Senedd Brydeinig gymeradwyo'r Codau ac iddynt ddod i rym, byddwn

yn gallu cymryd camau gorfodi pan na fydd cwmnïau'n cymryd y camau gweithredu angenrheidiol.

- 1.7 Mae gan dwf ac arloesedd yn y ffordd y defnyddir tonnau awyr y DU gan amrywiaeth gynyddol o ddiwydiannau, gan gynnwys sector gofod a lloeren sy'n tyfu, oblygiadau i'n gwaith sbectrwm. Er enghraifft, mae dros 10,000 o loerennau gweithredol mewn orbit erbyn hyn, o'i gymharu ag oddeutu 2,000 yn 2018. Rydym yn canolbwyntio ar ganfod a sicrhau bod sbectrwm ar gael i gefnogi anghenion ein sectorau ac i feithrin gwasanaethau newydd a gwasanaethau sy'n bodoli eisoes. Yn benodol, bydd ein harwerthiant sbectrwm yn 2025/26 yn dyfarnu trwyddedau sbectrwm mmWave mewn ardaloedd dwysedd uchel.

Y flwyddyn i ddod

- 1.8 Datblygwn y Cynllun hwn yng nghyd-destun Llywodraeth newydd yn y DU, yr ymgysylltwn â hi i ddeall ei blaenoriaethau wrth nodi ei Datganiad Blaenoriaethau Strategol ar gyfer telegyfathrebiadau, sbectrwm a phost. Mae'r Llywodraeth eisoes wedi cyhoeddi ei [Datganiad Blaenoriaethau Strategol ar gyfer Diogelwch Ar-lein drafft](#) i ymgynghori arno.
- 1.9 Mae ein Cynllun Gwaith yn canolbwyntio ar bedair blaenoriaeth, **'Rhyngwrwyd a phost y gallwn ddibynnu arnynt'**, **'Cyfryngau rydym yn ymddiried ynddynt ac yn eu gwerthfawrogi'**, **'Rydyn ni'n byw bywyd mwy diogel ar-lein'**, a **'Galluogi gwasanaethau di-wifr yn economi'r DU'**.

Rhyngwrwyd a phost y gallwn ddibynnu arnynt



Bod rhwydweithiau a gwasanaethau o ansawdd uchel ar gael lle mae eu hangen



Rhwydweithiau a gwasanaethau dibynadwy a diogel y gall pobl ddibynnu arnynt nhw



Marchnadoedd effeithlon a chynaliadwy lle mae cystadleuaeth yn darparu dewis, gwerth a gwasanaethau o ansawdd uchel



Defnyddwyr yn cael eu trin yn deg ar bob cam o daith y cwsmer, beth bynnag fo'u hamgylchiadau



Gwasanaeth post cynaliadwy a fforddiadwy sydd ar gael ledled y DU, sy'n diwallu anghenion cwsmeriaid sy'n esblygu.

Cyfryngau rydym yn ymddiried ynddynt ac yn eu gwerthfawrogi



Gall cynulleidfaoedd ganfod a chyrru amrywiaeth eang o gynnwys, fel cynnwys cyfryngau gwasanaeth cyhoeddus sy'n cael ei gynhyrchu ledled y DU ac sy'n adlewyrchu ei amrywiaeth



Gall cynulleidfaoedd ganfod a chyrru amrywiaeth o newyddion sy'n briodol gywir, yn briodol ddiudedd ac yn ddibynadwy.



Mae darparwyr cyfryngau yn cystadlu'n deg ac yn agored am gynulleidfaoedd.



Mae cynulleidfaoedd yn cael eu hamddiffyn rhag niwed, a rhyddid mynegiant yn cael ei ddiogelu.

Rydyn ni'n byw bywyd mwy diogel ar-lein



Sefydlu'r drefn diogelwch ar-lein i fod yn llwyddiant gyda'r bobl, y systemau, y prosesau a'r cysylltiadau cywir yn eu lle



Llywodraethu diogelwch cryfach mewn gwasanaethau ar-lein yn seiliedig ar ddealltwriaeth glir o risgiau



Gwasanaethau ar-lein wedi'u dylunio a'u gweithredu gyda diogelwch mewn golwg



Mwy o ddewis i ddefnyddwyr iddynt gael rheolaeth ystyrion dros eu profiadau ar-lein



Mwy o ymddiriedaeth yn y byd ar-lein drwy gael mwy o dryloywder gyda sut mae llwyfannau'n cadw defnyddwyr yn ddiogel – a beth mae Ofcom yn ei wneud i hybu newidiadau



Sicrhau mynediad rhanddeiliaid at sbectrwm a lliniaru ymyriant niweidiol drwy drwyddedu, cynllunio, monitro a chydymffurfio sy'n galluogi gwasanaethau di-wifr



Canfod a darparu sbectrwm i ddiwallu anghenion newidiol sectorau, gan gynnwys band eang symudol a gwasanaethau gofod



Esblygu ein fframweithiau rheoli sbectrwm i gefnogi defnydd mwy effeithlon, gwella cyflymder a hyblygrwydd mynediad a gwella argaeledd sbectrwm



Arwain a dylanwadu ar drafodaethau rhyngwladol ar fynediad sbectrwm ar yr un pryd â chynrychioli buddiannau'r DU yn effeithiol

Mae ein gwaith sy'n cefnogi'r cam o ddarparu **Rhyngwryd a Phost y gallwn ddibynnu arnynt yn 2025/26** yn cynnwys:

- Yr Adolygiad o Fynediad Telegyfathrebiadau a'r Adolygiad o'r Farchnad Llais Cyfanwerthol
- Diogelwch Telegyfathrebiadau a Seilwaith Digidol
- Adolygiad o Rwymedigaeth Gwasanaeth Post Cyffredinol

Mae ein gwaith sy'n cefnogi'r cam o ddarparu **Cyfryngau rydym yn ymddiried ynddynt ac yn eu gwerthfawrogi yn 2025/26** yn cynnwys:

- Gweithredu'r Ddeddf Cyfryngau
- Adolygiad Cyfryngau Gwasanaeth Cyhoeddus
- Adolygiad cyfnodol y BBC
- Amddiffyn cynulleidfaoedd rhag niwed

Mae ein gwaith sy'n cefnogi **Rydyn ni'n byw bywyd mwy diogel ar-lein yn 2025/26** yn cynnwys:

- Sicrhau bod y drefn diogelwch ar-lein yn cael ei rheoleiddio'n effeithiol
- Mynd i'r afael â niwed anghyfreithlon a diogelu plant ar-lein
- Gweithio gyda phartneriaid

Mae ein gwaith sy'n cefnogi **Galluogi di-wifr yn economi'r DU yn 2025/26** yn cynnwys:

- Ymgysylltu rhyngwladol ar reoli sbectrwm
- Cefnogi arloesedd drwy sicrhau bod sbectrwm ar gael yn amserol a mwy o rannu
- Effeithlonrwydd parhaus drwy alluoedd rheoli sbectrwm uwch

Ein gwaith ategol

- 1.10 Er mwyn cyflawni ein blaenoriaethau yn y flwyddyn i ddod, byddwn yn parhau i fuddsoddi a datblygu ein sgiliau a'n galluoedd ar draws y sefydliad. Mae ein rhaglen ymchwil yn rhoi sylfaen dystiolaeth gadarn i ni i helpu i lywio ein penderfyniadau polisi, ac mae ein rhaglen sganio'r gorwel yn ein helpu i ddeall datblygiadau allweddol a thueddiadau yn y dyfodol. Byddwn hefyd yn mabwysiadu prosesau mewnol mwy ystwyth, gan wneud gwell defnydd o dechnolegau a data newydd ar draws ein gwaith.
- 1.11 Yn allanol, mae ein cydweithrediad â rheoleiddwyr yn hanfodol drwy ein cysylltiadau rhyngwladol cynyddol, a'n gwaith gyda rheoleiddwyr eraill yn ddomestig mewn fforymau fel y Fforwm Cydweithredu ar Reoleiddio Digidol (DRCF). Byddwn hefyd yn parhau i ddefnyddio ystod eang o bartneriaethau sefydledig gyda'r byd academiaidd, diwydiant, elusennau ac arbenigwyr eraill.

2. Ein blaenoriaethau ar gyfer 2025/26

- 2.1 Fel rheoleiddiwr cyfathrebiadau'r DU, ein cenhadaeth yw sicrhau bod cyfathrebiadau'n gweithio i bawb. Mae ein dyletswyddau a'n swyddogaethau wedi'u nodi mewn nifer o Ddeddfau Seneddol a deddfwriaeth arall (mae crynodeb llawn yn [Atodiad 1](#)), a'n prif ddyletswydd yw hyrwyddo buddiannau dinasyddion a defnyddwyr ynglŷn â materion cyfathrebu, lle bo hynny'n briodol drwy hybu cystadleuaeth.
- 2.2 Fel rheoleiddiwr statudol annibynnol, mae ein Cynllun Gwaith yn seiliedig ar y dyletswyddau hyn, Datganiad Blaenoriaethau Strategol a [chanllawiau statudol](#)¹ Llywodraeth y DU, a chyfoeth o dystiolaeth a gasglwyd drwy ymchwil, dadansoddi, dealltwriaeth ac ymgysylltu cadarn. Mae'r Cynllun Gwaith yn canolbwyntio ar bedair blaenoriaeth sy'n seiliedig ar dystiolaeth: **'Rhyngwrwd a phost y gallwn ddibynnu arnynt'**, **'Cyfryngau rydym yn ymddiried ynddynt ac yn eu gwerthfawrogi'**, **'Rydyn ni'n byw bywyd mwy diogel ar-lein'**, a **'Galluogi gwasanaethau di-wifr yn economi'r DU'**.

Datganiad Blaenoriaethau Strategol

- 2.3 Pan fydd Llywodraeth y DU yn nodi ei blaenoriaethau strategol ar gyfer telegyfathrebiadau, rheoli sbectrwm radio a gwasanaethau post, neu ar gyfer materion diogelwch ar-lein, mewn Datganiad Blaenoriaethau Strategol, rhaid i ni ystyried y datganiad wrth gyflawni ein swyddogaethau rheoleiddio.²
- 2.4 Mae Llywodraeth newydd y DU wedi cadarnhau ei bod yn bwriadu dynodi Datganiad Blaenoriaethau Strategol newydd ar gyfer telegyfathrebiadau, rheoli sbectrwm radio a gwasanaethau post, a Datganiad Blaenoriaethau Strategol ar gyfer materion diogelwch ar-lein. Byddwn yn cynnwys adolygiad o'r hyn rydym wedi'i wneud o ganlyniad i'r Datganiad yn ein Hadroddiad Blynyddol.

¹ Mae gan Ofcom ddyletswydd i ystyried canllawiau statudol a gyhoeddwyd gan Lywodraeth y DU sy'n nodi sut gall rheoleiddwyr sydd o fewn cwmpas y ddyletswydd twf gefnogi twf economaidd cynaliadwy yn well, drwy'r penderfyniadau maen nhw'n eu gwneud a drwy'r ffordd maen nhw'n rheoleiddio. (Gweler [Atodiad 1](#) am fanylion dyletswyddau Ofcom, gan gynnwys y ddyletswydd twf.)

² Yn 2019, dynododd y Llywodraeth ar y pryd y [Datganiad Blaenoriaethau Strategol ar gyfer telegyfathrebiadau, rheoli'r sbectrwm radio a gwasanaethau post](#). Nid oes unrhyw Ddatganiad Blaenoriaethau Strategol ar gyfer materion diogelwch ar-lein wedi'i ddynodi hyd yma, ond mae Llywodraeth y DU wedi cyhoeddi ei Datganiad Blaenoriaethau Strategol drafft.

Ein blaenoriaethau

Mae'r adran ganlynol yn rhoi manylion am ein pedair blaenoriaeth, a sut bydd ein prosiectau a'n rhaglenni yn ystod 2025/26 yn eu cefnogi i gael eu cyflawni.

Mae rhestr gynhwysfawr o'r gwaith prosiect cysylltiedig wedi'i nodi yn 'Atodiad Prosiect' y Cynllun Gwaith ([Atodiad 2](#)).

Rhynggrwyd a phost y gallwn ddibynnu arnynt



Mae'r flaenoriaeth hon yn ymwneud â sicrhau bod gan ddefnyddwyr yn y DU fynediad at rwydweithiau ffeibr llawn, o ansawdd uchel, sy'n gallu delio â gigabits, ac argaeledd gwasanaethau post a chyfathrebu. Rydym yn canolbwyntio ar wella diogelwch a chadernid rhwydweithiau i fodloni gofynion dinasyddion.

- 2.5 Ein nod yw diogelu buddiannau defnyddwyr a galluogi pawb, ym mhob man, i gael gafael ar wasanaethau a rhwydweithiau cyflym a dibynadwy. Dylai ein marchnadoedd cyfathrebiadau ddarparu dewis a gwerth i ddefnyddwyr, gan alluogi ystod eang o wasanaethau digidol sy'n sbarduno twf economaidd. Dylai defnyddwyr sy'n dibynnu ar ddanfon llythyrau a pharseli elwa o wasanaethau post fforddiadwy, dibynadwy a chynaliadwy sy'n diwallu anghenion pob defnyddiwr, yn enwedig y rheini sy'n fwy agored i niwed.
- 2.6 Wrth gyflawni ein gwaith i ddarparu 'Rhynggrwyd a phost y gallwn ddibynnu arnynt', rydym yn ceisio sicrhau'r canlyniadau canlynol i ddefnyddwyr:

- Bod rhwydweithiau a gwasanaethau o ansawdd uchel ar gael lle mae eu hangen.
- Rhwydweithiau dibynadwy a diogel y gall pobl ddibynnu arnynt nhw.
- Marchnadoedd effeithlon a chynaliadwy lle mae cystadleuaeth yn darparu dewis, gwerth a gwasanaethau o ansawdd uchel.
- Defnyddwyr yn cael eu trin yn deg ar bob cam o daith y cwsmer, beth bynnag fo'u hamgylchiadau.
- Gwasanaeth post cynaliadwy a fforddiadwy sydd ar gael ledled y DU, sy'n diwallu anghenion cwsmeriaid sy'n esblygu.

- 2.7 Mae sicrhau bod seilwaith digidol ar gael lle mae ei angen yn parhau i fod yn flaenoriaeth. Eleni byddwn yn cwblhau'r Adolygiad Mynediad Telegyfathrebiadau nesaf, a fydd yn gosod y fframwaith rheoleiddio sy'n berthnasol rhwng mis Ebrill 2026 a mis Mawrth 2031, gyda'r nod o hyrwyddo cystadleuaeth a buddsoddiad mewn band eang sy'n gallu delio â gigabits. Byddwn yn parhau i fonitro cydymffurfiaeth â'r rheolau y gwnaethom eu gosod yn Adolygiad o'r Farchnad Telegyfathrebiadau Sefydlog Gyfanwerthol, a fydd yn aros yn eu lle tan fis Mawrth 2026, i sicrhau bod cystadleuaeth yn cael ei chyflawni'n deg, gan gynnwys drwy waith parhaus ein Huned Monitro Openreach.

2.8 Wrth i risgiau esblygu oherwydd datblygiadau technolegol a geowleidyddol, mae bygythiadau diogelwch sy'n wynebu rhwydweithiau a gwasanaethau telegyfathrebiadau yn y DU yn parhau i gynyddu o ran nifer a chymhlethdod. Er mwyn sicrhau bod rhwydweithiau a gwasanaethau cyhoeddus yn ddiogel, byddwn yn parhau i weithio'n agos gyda chwmnïau telegyfathrebiadau i geisio gwella eu diogelwch a monitro eu cydymffurfiad â'u dyletswyddau diogelwch. Bwriad y gwaith hwn yw sicrhau bod gan ddarparwyr cyhoeddus fesurau priodol a chymesur ar waith i nodi a lleihau'r risgiau o gyfaddawdau diogelwch, a'u bod yn barod ar gyfer risgiau yn y dyfodol. Byddwn hefyd yn parhau â'n gwaith gyda'r Ganolfan Seiberddiogelwch Genedlaethol (NCSC), gwerthwyr offer a'r gymuned safonau.



2.9 Mae'r farchnad bost wedi newid yn sylweddol dros y blynyddoedd diwethaf, wrth i'r galw newid o llythyrau i barseili. Ein nod yw sicrhau bod pob defnyddiwr post yn parhau i allu cael gafael ar wasanaethau fforddiadwy a dibynadwy ledled y DU sy'n diwallu eu hanghenion sy'n esblygu. Mae angen i ni hefyd ystyried cynaliadwyedd ariannol ac effeithlonrwydd y gwasanaeth post cyffredinol yn unol ag ymddygiad newidiol defnyddwyr. Mae ein gwaith presennol yn canolbwyntio i raddau helaeth ar ystyried a oes angen diwygio'r gwasanaeth cyffredinol ar gyfer llythyrau a sut. Yn y dyfodol, byddwn yn edrych ymhellach ar sut mae sicrhau bod post yn parhau i fod yn fforddiadwy, a bod y Post Brenhinol yn cael ei gymell i ddarparu gwasanaeth mwy dibynadwy.

2.10 Yn ystod y flwyddyn i ddod, bydd ein prosiectau a'n rhaglenni allweddol i gyflawni blaenoriaeth 'Rhyngwyd a phost y gallwn ddibynnu arnynt' yn cynnwys:

- **Adolygiad o Fynediad Telegyfathrebiadau:** Mae'r fframwaith rheoleiddio presennol a osodwyd gennym yn 2021 yn dod i ben ym mis Mawrth 2026. Byddwn yn cyhoeddi ein hasesiad dros dro o'r marchnadoedd telegyfathrebiadau sefydlog cyfanwerthol cyn cyhoeddi ein penderfyniad ar y fframwaith rheoleiddio newydd, a fydd yn nodi rheoliadau rhwng mis Ebrill 2026 a mis Mawrth 2031. Bydd hyn yn cynnwys y marchnadoedd ar gyfer mynediad i seilwaith ffisegol, mynediad lleol cyfanwerthol, mynediad i linellau ar brydles a chysylltedd rhyng-gyfnwid.
- **Adolygiad o Fynediad Telegyfathrebiadau (yn Ardal Hull):** Mae'r fframwaith rheoleiddio ar wahân, presennol a osodwyd gennym yn 2021 yn dod i ben ym mis

Hydref 2026. Bydd yr adolygiad hwn yn cwmpasu'r marchnadoedd telegyfathrebiadau sefydlog yn ardal Hull rhwng mis Tachwedd 2026 a mis Hydref 2031. Byddwn yn asesu a yw'r fframwaith a sefydlwyd gennym yn 2021 yn dal yn briodol yng ngoleuni cystadleuaeth seilwaith sy'n dod i'r amlwg.

- **Adolygiad o'r Farchnad Llais Cyfanwerthol:** Bydd yr Adolygiad o'r Farchnad Llais Cyfanwerthol yn asesu ein gwaith o reoleiddio dull terfynu galwadau sy'n cefnogi darparu gwasanaethau llinell dir a ffonau symudol yn y DU. Byddwn yn rhoi rheoliadau ar waith a fydd yn berthnasol am bum mlynedd o fis Ebrill 2026 ymlaen.
- **Adolygiad Terfynu SMS A2P Cyfanwerthol:** Byddwn yn cyhoeddi ymgynghoriad yn nodi ein dadansoddiad o'r farchnad Terfynu SMS Ap-i-Berson ('A2P') Cyfanwerthol, a sut mae'n effeithio ar y negeseuon swmp sy'n cael eu hanfon gan fusnesau a chyrrff cyhoeddus at ddefnyddwyr a dinasyddion (ee nodiadau atgoffa am apwyntiadau ysbyty, hysbysiadau danfon), gyda'r nod o gyhoeddi datganiad yn hydref 2025.
- **Diogelwch Telegyfathrebiadau a Seilwaith Digidol:** Gan ddefnyddio ein pwerau, a gyflwynwyd gan Ddeddf Telegyfathrebiadau (Diogelwch) 2021, byddwn yn parhau i fonitro cydymffurfiad darparwyr cyfathrebiadau â'r fframwaith diogelwch newydd. Yn unol â'n swyddogaeth adrodd newydd (a.105Z) byddwn yn cyflwyno ein hadroddiad blynyddol i'r Ysgrifennydd Gwladol ar ddiogelwch telegyfathrebiadau. Byddwn yn gweithredu unrhyw gyfarwyddyd monitro a gyhoeddir gan Lywodraeth y DU o dan y fframwaith gwerthwyr risg uchel. O dan gyfrifoldebau ein Rheoliadau Rhwydweithiau a Systemau Gwybodaeth, byddwn yn parhau i fonitro bod gweithredwyr gwasanaethau hanfodol yn y sector seilwaith digidol yn rheoli eu risgiau diogelwch drwy raglen sicrwydd, sy'n cynnwys casglu gwybodaeth yn ffurfiol. Byddwn hefyd yn parhau i gyflawni ein swyddogaeth monitro digwyddiadau ac yn rhedeg ein cynllun profion treiddio gwirfoddol (TBEST) ar gyfer darparwyr cyfathrebiadau. Byddwn yn parhau i ymgysylltu â gwerthwyr a chyrrff safonau technegol i sicrhau ein bod yn cynnal dealltwriaeth ehangach o'r ecosystem telegyfathrebiadau sy'n esblygu.
- **Adolygiad o Rwymedigaeth Gwasanaeth Post Cyffredinol:** Rydym yn cydnabod yr angen brys i gysoni'r Rhwymedigaeth Gwasanaeth Cyffredinol ar gyfer y post ag anghenion ei ddefnyddwyr, ar yr un pryd ag ystyried cynaliadwyedd y gwasanaeth. Byddwn yn parhau â'n gwaith ar ddiwygio'r ddarpariaeth o wasanaeth post cyffredinol gyda'r nod o gyhoeddi penderfyniad yn Ch2 2025/26. Byddwn hefyd yn parhau â'n gwaith i sicrhau bod ein trefn ansawdd gwasanaeth yn cymell y Post Brenhinol i wella ei berfformiad a bod gwasanaethau post cyffredinol yn parhau i fod yn fforddiadwy.

2.11 Yn ogystal â'r meysydd â ffocws a nodir uchod, mae gennym hefyd raglenni parhaus sy'n cefnogi ein gwaith yn y maes hwn:

- **Darpariaeth symudol:** Byddwn yn parhau i weithio gyda'r diwydiant i wella cywirdeb a chysondeb y wybodaeth am y ddarpariaeth a'r perfformiad sydd ar gael. Byddwn yn edrych ar sut gall gwahanol ffynonellau data yn y byd go iawn roi mwy o wybodaeth i ddefnyddwyr am y perfformiad symudol y gallant ei ddisgwyl, gan gynnwys manau gwan o ran darpariaeth. Byddwn yn ystyried sut y gallwn wella sut

mae'r wybodaeth hon yn cael ei chyflwyno a'i chyfathrebu, er mwyn i ddefnyddwyr a rhanddeiliaid allu ei defnyddio yn y ffordd fwyaf effeithiol.

- **Mynd i'r afael â galwadau a negeseuon testun sgam:** Byddwn yn parhau i ddarparu ein strategaeth i'w gwneud yn anodd i sgamwyr niweidio defnyddwyr drwy ddefnyddio rhwydweithiau telegyfathrebiadau'r DU. Byddwn yn defnyddio ein rheolau presennol i darfu ar sgamiau, cydweithio a rhannu gwybodaeth ar draws sectorau i sicrhau dull gweithredu cydgysylltiedig ac ystyried a oes angen mesurau pellach i ddiogelu defnyddwyr rhag sgamiau.
- **Teitlau Byd-eang:** Byddwn yn parhau â'n gwaith i fynd i'r afael â signalau maleisus sy'n deillio o [Deitlau Byd-eang y DU](#), gan godi pryderon ynghylch diogelwch rhwydweithiau. Mae'r Teitlau hyn yn cael eu creu o rifau symudol y DU gan weithredwyr symudol i gael mynediad i'r rhwydwaith signalau symudol byd-eang. Maent fel arfer yn sail i ddarparu gwasanaethau symudol dilys, ond mae tystiolaeth eu bod weithiau'n cael eu camddefnyddio, er enghraifft er mwyn dod o hyd i bobl yn anghyfreithlon a'u holrhain gan ddefnyddio eu ffonau symudol ar rwydweithiau eraill. Ar ôl cyhoeddi ein datganiad ym Mawrth 2025 sy'n nodi unrhyw reolau newydd neu gryfach i ymdrin â chamddefnyddio Teitlau Byd-eang, byddwn yn monitro'r broses o weithredu unrhyw newid i reolau, i sicrhau bod gweithredwyr gwael yn cael eu hatal rhag defnyddio'r rhwydwaith signalau symudol byd-eang.
- **Symud oddi wrth hen wasanaethau:** Mae rheoli'r broses o symud oddi wrth hen wasanaethau fel [gwasanaethau ffôn llinell dir rhwydwaith ffôn cyfnewidfa gyhoeddus traddodiadol](#) a [rhwydweithiau symudol 2G/3G](#) yn allweddol i sicrhau bod pobl yn parhau i elwa ar rwydweithiau mwy dibynadwy ac effeithiol. Byddwn yn parhau i weithio gyda diwydiant a'r llywodraeth i sicrhau bod cwsmeriaid yn cael eu cynorthwyo a'u diogelu drwy'r cyfnodau pontio.
- **Adolygiad o ddulliau amgen o ddatrys anghydfod mewn telegyfathrebiadau:** Mae dulliau amgen o ddatrys anghydfod yn darparu mesur diogelwch pwysig drwy asesiad annibynnol a diduedd o gwynion heb eu datrys, rhwng defnyddiwr a'i ddarparwr. Byddwn yn cwblhau ein hadolygiad drwy asesu gallu defnyddwyr i gael mynediad at ddulliau amgen o ddatrys anghydfod, asesu taith defnyddwyr drwy'r prosesau hyn a throsolwg Ofcom o'r cynlluniau.
- **Marchnadoedd digidol:** Mae'r Memorandwm Cyd-ddealltwriaeth rhwng yr Awdurdod Cystadleuaeth a Marchnadoedd ac Ofcom yn nodi sut byddwn yn gweithio gyda'r Awdurdod Cystadleuaeth a Marchnadoedd mewn marchnadoedd digidol. Fel y nodir yn y Memorandwm Cyd-ddealltwriaeth, byddwn yn ymgysylltu â'r Awdurdod a'i Uned Marchnadoedd Digidol, lle mae swyddogaethau'r Uned yn effeithio ar ein cylch gwaith rheoleiddio ac i'r gwrthwyneb.
- **Adrodd ar ddata:** Byddwn yn parhau i adrodd ar ddarpariaeth, nifer, defnydd ac argaeledd rhwydweithiau band eang a symudol ar draws gwledydd a rhanbarthau'r DU. Byddwn hefyd yn adrodd ar gynlluniau darparwyr sy'n edrych tua'r dyfodol i gyflwyno rhwydweithiau sy'n gallu delio â gigabits.
- **Monitro'r post:** Byddwn yn parhau â'n gwaith monitro ar draws y sector post, a fydd yn edrych ar effaith rhwymedigaethau ar y farchnad parseli ar gyfer delio â chwynion, y rhwymedigaeth newydd ar weithredwyr i sicrhau bod cwsmeriaid anabl

yn cael eu trin yn deg, yn ogystal â chynnydd effeithlonrwydd y Post Brenhinol a chynaliadwyedd tymor hwy y Rhwymedigaeth Gwasanaeth Cyffredinol.

- **Gwasanaethau cyfradd premiwm:** Byddwn yn monitro cydymffurfiad â'r fframwaith rheoleiddio newydd ar gyfer gwasanaethau a godir ar filiau ffôn defnyddwyr. Byddwn yn sicrhau bod defnyddwyr yn parhau i gael eu diogelu wrth ddefnyddio'r gwasanaethau hyn ar ôl trosglwyddo'r cyfrifoldeb rheoleiddio o ddydd i ddydd o'r Awdurdod Gwasanaethau Talu dros y Ffôn (PSA) i Ofcom.

Cyfyngau rydym yn ymddiried ynddynt ac yn eu gwerthfawrogi



Mae'r flaenoriaeth hon yn ymwneud â sicrhau bod cynulleidfaoedd ledled y DU yn gallu parhau i gael gafael ar amrywiaeth o gyfyngau darlledu a'u bod yn cael eu diogelu rhag cynnwys niweidiol. Wrth i bobl symud fwyfwy ar-lein ar gyfer adloniant a gwybodaeth, mae'n arbennig o bwysig eu bod yn gallu cael gafael ar newyddion a ddarlledir sy'n ddibynadwy, yn gywir ac yn ddiuedd.

- 2.12 Mae'r sector darlledu yn rhan hanfodol o ddiwylliant ac economi'r DU ac mae'n newid yn gyson o ganlyniad i gystadleuwyr byd-eang, cydgyfeirio digidol ac arloesi technolegol. Ein nod yw sicrhau bod pob cynulleidfa yn gallu parhau i ganfod a mwynhau amrywiaeth eang o gynnwys perthnasol o ansawdd uchel, boed hynny ar deledu a radio wedi'u hamserlennu, neu wedi'i ffrydio ac ar-alw.
- 2.13 Wrth gyflawni ein gwaith i ddarparu 'Cyfyngau rydym yn ymddiried ynddynt ac yn eu gwerthfawrogi', mae ein rhaglen o waith yn ceisio sicrhau'r canlyniadau canlynol:

- Gall cynulleidfaoedd ganfod a chyrchu amrywiaeth eang o gynnwys, fel cynnwys cyfyngau gwasanaeth cyhoeddus sy'n cael ei gynhyrchu ledled y DU ac sy'n adlewyrchu ei amrywiaeth.
- Gall cynulleidfaoedd ganfod a chyrchu amrywiaeth o newyddion sy'n briodol gywir, yn briodol ddiuedd ac yn ddibynadwy.
- Mae darparwyr cyfyngau yn cystadlu'n deg ac yn agored am gynulleidfaoedd.
- Mae cynulleidfaoedd yn cael eu hamddiffyn rhag niwed, a rhyddid mynegiant yn cael ei ddiogelu.

- 2.14 Mae cefnogi'r sector i addasu i newidiadau mewn arferion cynulleidfaoedd a sicrhau bod ein dull rheoleiddio yn parhau i fod yn effeithiol yn un o'n blaenoriaethau ar gyfer y flwyddyn i ddod. Y llynedd, cafwyd y diweddariad mawr cyntaf i ddeddfwriaeth darlledu'r DU mewn 20 mlynedd. Mae Deddf Cyfyngau 2024 ("y Ddeddf Cyfyngau") yn adlewyrchu'r argymhellion a wnaethom yn ein hadolygiad diwethaf o gyfyngau gwasanaeth cyhoeddus yn 2021. Byddwn yn parhau i weithredu'r mesurau deddfwriaethol newydd hyn drwy gydol 2025/26, gan gynnwys drwy sicrhau bod cynulleidfaoedd y DU yn cynnal mynediad hawdd at

gyfryngau gwasanaeth cyhoeddus byw ac ar-alw, ymestyn amddiffyniadau safonau golygyddol i wasanaethau fideo ar-alw Haen 1 dynodedig (h.y. y rheini sy'n ddarostyngedig i'r Cod Fideo Ar-alw newydd a'r gofynion hygyrchedd newydd) a sicrhau dyfodol newyddion lleol ar wasanaethau radio ledled y DU.



- 2.15 Mae cyflymder parhaus y newid yn golygu bod yn rhaid i ni barhau i asesu a oes angen rhagor o ddiwygio i ddiogelu cyfryngau gwasanaeth cyhoeddus hanfodol ar gyfer cynulleidfaoedd yn y DU. Byddwn yn cwblhau ein hadolygiad cyfryngau gwasanaeth cyhoeddus nesaf yn 2025/26, gan ganolbwyntio ar gyfleoedd i gefnogi cynaliadwydd cyfryngau gwasanaeth cyhoeddus yn y dyfodol ac argaeledd newyddion cywir o ansawdd uchel y gall cynulleidfaoedd ddibynnu arnynt.
- 2.16 Byddwn yn parhau i orfodi cydymffurfiad â'n rheolau safonau cynnwys ar gyfer teledu a radio. Bydd diogelu hawl darlledwyr a chynulleidfaoedd i ryddid mynegiant yn dal yn ystyriaeth bwysig, ac rydym yn rhoi blaenoriaeth i orfodi rheolau sy'n ymwneud â niwed posibl i gynulleidfaoedd.
- 2.17 Ein prif brosiectau dros y flwyddyn nesaf i gefnogi ein blaenoriaethau yw:

- **Gweithredu'r Ddeddf Cyfryngau:** Rydym wedi cyhoeddi map er mwyn gweithredu ond mae trosolwg o'r rhaglen waith isod:
 - **Diweddarau gofynion rheoleiddio Darlledwyr Gwasanaeth Cyhoeddus:** Rydym yn datblygu ein cynigion ar gyfer gweithredu newidiadau i'r fframwaith Darlledwyr Gwasanaeth Cyhoeddus o ganlyniad i'r Ddeddf Cyfryngau. Yn dilyn ymgynghoriadau ddechrau 2025, byddwn yn cyhoeddi canllawiau ar gyfer datganiadau polisi rhaglenni a chanllawiau ar gwotâu a chomisiynu gan gynhyrchwyr annibynnol yn Ch2 2025/26.
 - **Digwyddiadau Rhestredig:** Byddwn yn ymgynghori ar ein cynigion ar gyfer gweithredu newidiadau'r Ddeddf Cyfryngau i'r drefn Digwyddiadau Rhestredig, ac wedyn yn cyhoeddi ein datganiad terfynol yn Ch3 2025/26.

- **Amlygrwydd ac argaeledd Darlledwyr Gwasanaeth Cyhoeddus ar-alw:** Byddwn yn cyflwyno cyngor i'r Ysgrifennydd Gwladol ynghylch pa lwyfannau teledu ddylai fod yn destun rheoleiddio newydd, ac yn ystyried ceisiadau gan ddarlledwyr gwasanaeth cyhoeddus i'w chwaraewyr ddod o dan y rheoliadau newydd. Byddwn hefyd yn ymgynghori ar god ymarfer a chanllawiau ar gyfer llwyfannau a darlledwyr gwasanaeth cyhoeddus ynghylch sut mae cydymffurfio â'r drefn.
- **Mesurau diogelu cynulleidfaoedd newydd ar gyfer fideo ar-alw:** Byddwn yn paratoi adroddiad ar weithrediad y farchnad fideo ar-alw yn y DU, gan ymateb i gais gan yr Ysgrifennydd Gwladol ym mis Medi. Rhaid i'r Ysgrifennydd Gwladol ystyried cynnwys adroddiad Ofcom cyn gwneud rheoliadau sy'n pennu'r gwasanaethau sydd wedi'u dynodi'n wasanaethau 'Haen 1'. Yn amodol ar benderfyniad yr Ysgrifennydd Gwladol ar ddarparwyr Haen 1 dynodedig, byddwn yn ymgynghori ar gyflwyno gofynion hygyrchedd ar gyfer gwasanaethau fideo ar-alw o fewn y cwmpas.
- **Rheoleiddio radio:** Byddwn yn cyhoeddi ein datganiad ar ofynion newyddion a gwybodaeth lleol newydd ar gyfer radio masnachol analog a gofynion newydd ar gyfer amblecsau radio digidol yn Ch2 2025/26.
- **Cynorthwyr llais:** Byddwn yn rhoi gwybod i'r Ysgrifennydd Gwladol ynghylch pa wasanaethau dewis radio y dylid eu dynodi yn Ch1 2025/26. Byddwn wedyn yn rhoi proses ar waith ar gyfer gwasanaethau radio'r rhyngwlad i roi gwybod i ni er mwyn cael budd o'r ddeddfwriaeth. Byddwn yn ymgynghori ar god ymarfer ar gyfer gwasanaethau dewis radio unwaith y bydd yr Ysgrifennydd Gwladol wedi dynodi gwasanaethau perthnasol.

- **Adolygiad o Gyfryngau Gwasanaeth Cyhoeddus:** Mae ein hadolygiad yn edrych ar sut gellir cynnal a chryfhau'r ddarpariaeth o gynnwys cyfryngau gwasanaeth cyhoeddus ar gyfer y degawd nesaf a thu hwnt. Byddwn yn cyhoeddi canfyddiadau ein hadolygiad erbyn diwedd Ch2 2025/26. Gallai hyn gynnwys meysydd lle rydym yn bwriadu ymgynghori ar newidiadau i rai o'n rheolau, yn ogystal â nodi lle gallai fod angen rhagor o ymyrraeth gan Lywodraeth y DU.
- **Gweithredu newidiadau o Adolygiad Canol Tymor y BBC:** Ar ôl cyhoeddi'r Cytundeb Fframwaith wedi'i ddiweddarau rhwng yr Adran dros Dechnoleg Ddigidol, Diwylliant, y Cyfryngau a Chwaraeon a'r BBC, byddwn yn diweddarau canllawiau ar gystadleuaeth; yn datblygu Cod Deunydd Ar-lein y BBC ac yn cynnal adolygiad rheolaidd o benderfyniadau Uned Cwynion Gweithredol y BBC nad ydynt wedi cael eu huwchgyfeirio i Ofcom.
- **Newidiadau arfaethedig i wasanaethau sain y BBC:** Fel rhan o'n gwaith parhaus i fonitro perfformiad y BBC ac effaith y BBC ar y farchnad, byddwn yn cwblhau ein hasesiad o Brofion Budd y Cyhoedd y BBC ar bedair gorsaf newydd arfaethedig y BBC ar DAB+ a newidiadau i BBC Radio 5 Sports Extra, a byddwn yn cyhoeddi canlyniad ein hasesiad.

- **Cynnal Adolygiad Cyfnodol y BBC:** Byddwn yn darparu'r Adolygiad Cyfnodol nesaf cyn i Siarter y BBC ddod i ben yn Rhagfyr 2027, ac yn disgwyl ei gwblhau erbyn Ch4 2025/26.
- **Hysbysebu Bwydydd Llai Iach:** Byddwn yn parhau i weithio gyda'r Awdurdod Safonau Hysbysebu i baratoi ar gyfer gweithredu a gorfodi cyfyngiadau ar hysbysebu cynhyrchion bwyd a diod llai iach, a ddaw i rym ym mis Hydref 2025.

2.18 Mae ein Cynllun Gwaith hefyd yn cynnwys rhaglen barhaus o weithgareddau i sicrhau'r canlyniadau hyn i bob cynulleidfa:

- **Parhau i osod a gorfodi safonau cynnwys ar gyfer teledu a radio sy'n cael eu darlledu:** Byddwn yn blaenoriaethu achosion sy'n cynnwys niwed posibl i'r gynulleidfa, fel cynnwys sy'n debygol o gymell troseddu ac iaith casineb heb ei chyddestun, yn ogystal â chynnal didueddrwydd dyladwy a chywirdeb dyladwy mewn newyddion a didueddrwydd dyladwy mewn materion cyfoes. Byddwn yn adnewyddu ein Canllawiau ar y Cod Darlledu ac yn ei gyhoeddi ochr yn ochr â'r Cod Fideo ar Alw newydd sy'n deillio o'r Ddeddf Cyfryngau yn Ch3 2025/26.
- **Trwyddedu gwasanaethau darlledu teledu a radio:** Byddwn yn parhau i gyhoeddi, rheoli a chynnal trwyddedau ar gyfer yr holl wasanaethau teledu masnachol lleol a chenedlaethol, gwasanaethau radio masnachol digidol a gwasanaethau radio cymunedol digidol a gwasanaethau radio analog cyfyngedig. Byddwn yn ymateb i geisiadau gan randdeiliaid i wneud newidiadau i'r trwyddedau hynny lle bo hynny'n briodol. Byddwn yn cyhoeddi datganiad yn Ch1 2025/26, yn dilyn ymgynghoriad ar ddiwygiadau i'n Gweithdrefnau Cyffredinol ar gyfer ymchwilio i drwyddedau darlledu.
- **Cefnogi llwyfannau ar gyfer gwasanaethau darlledu:** Byddwn yn parhau i drwyddedu gwasanaethau radio digidol DAB ar raddfa fach ledled y DU ac yn cwblhau'r broses ar gyfer adnewyddu'r trwyddedau teledu lleol.
- **Hygyrchedd gwasanaethau teledu:** Byddwn yn parhau i orfodi gofynion ar gyfer gwasanaethau mynediad wrth ddarlledu – isdeitlau, disgrifiadau sain ac iaith arwyddion. Bydd ein hadroddiad blynyddol ar hygyrchedd teledu yn cael ei gyhoeddi yn Ch1 2025/26.
- **Tegwch, amrywiaeth a chynhwysiad ym maes darlledu:** Byddwn yn parhau i ymgysylltu â rhanddeiliaid yn y maes hwn, ac yn adrodd yn Ch3 2025/26 ar amrywiaeth gweithluoedd darlledwyr.
- **Monitro perfformiad y BBC ac effaith ar y farchnad:** Byddwn yn parhau i asesu cydymffurfriad y BBC â gofynion penodol yn y Cytundeb Fframwaith, y Fframwaith Gweithredu ac o dan y Drwydded Weithredu. Byddwn hefyd yn adrodd ar berfformiad y BBC yn ein Hadroddiad Blynyddol ar y BBC yn Ch3 2025/26.

Rydyn ni'n byw bywyd mwy diogel ar-lein




Mae'r flaenoriaeth hon yn ymwneud â sefydlu'r drefn diogelwch ar-lein i barhau â'n gwaith o adeiladu bywyd mwy diogel ar-lein ar gyfer holl ddefnyddwyr y DU, yn enwedig plant. Byddwn yn canolbwyntio ar sicrhau bod darparwyr yn cydymffurfio â'u rhwymedigaethau cyfreithiol i ddiogelu defnyddwyr, gan barhau i weithredu'r drefn ar yr un pryd.

- 2.19 Ein nod yw creu bywyd mwy diogel ar-lein i bobl yn y DU, yn enwedig plant. Ers pasio Deddf Diogelwch Ar-lein 2023, rydym wedi bod yn canolbwyntio ar sefydlu sylfeini'r drefn. Mae'r Ddeddf yn gymhleth ac yn fanwl, ac mae dadleuon yn parhau am lawer o'r niwed a'r materion y mae'n mynd i'r afael â nhw. Rydym wedi blaenoriaethu ein gwaith i weithredu'r meysydd rydym yn disgwyl y byddant o'r budd mwyaf i'r cyhoedd yn y DU cyn gynted â phosibl, fel yr amlinellir yn ein [Diweddariad Cynnydd ar Ddiogelwch Ar-lein](#).
- 2.20 Ym mis Rhagfyr 2024, byddwn yn cyhoeddi'r Codau Ymarfer Cynnwys Anghyfreithlon cyntaf. Ym mis Ionawr 2025, byddwn yn cyhoeddi canllawiau i ddarparwyr pornograffi ar-lein ynghylch sicrhau oedran, ochr yn ochr â'n canllawiau ar asesiadau mynediad i blant y mae'n rhaid i bob gwasanaeth chwilio a defnyddiwr-i-ddefnyddiwr ei wneud. Rydym yn disgwyl cyhoeddi'r Codau Ymarfer Amddiffyn Plant cyntaf ym mis Ebrill 2025. Mae hyn yn arwyddo o gam pwysig tuag at weithredu a gorfodi'r drefn Diogelwch Ar-lein – gan ddechrau gyda'r asesiadau risg y mae'n rhaid i wasanaethau chwilio a defnyddiwr-i-ddefnyddiwr eu gwneud. Am y tro cyntaf, bydd angen i wasanaethau ddeall pwy yw eu defnyddwyr, y risgiau a berir iddynt gan y gwasanaeth, a'r camau y bydd y gwasanaeth yn eu cymryd i liniaru'r risgiau hyn.
- 2.21 Bydd ein tîm goruchwyllo pwrpasol yn parhau i weithio'n agos gyda'r diwydiant ac yn sicrhau bod darparwyr yn cymryd y camau priodol i fynd i'r afael â'r niwed sy'n bodoli ar eu gwasanaethau. Rydym yn disgwyl i wasanaethau gymryd camau ac yn barod i ddefnyddio ein pwerau gorfodi lle rydym yn credu ei bod yn briodol gwneud hynny, yn unol â'n hegwyddorion rheoleiddio.
- 2.22 Byddwn hefyd yn dechrau rhoi'r gofynion rheoleiddio ychwanegol ar waith sy'n berthnasol i [wasanaethau wedi'u categorio](#) o dan y Ddeddf Diogelwch Ar-lein. Unwaith y bydd ein trothwyon wedi'u cadarnhau, gall ein gwaith ddechrau wedyn tuag at gyflawni ein dyletswyddau tryloywder, y disgwylwn iddynt fod y rhai mwyaf effeithiol o ran gwella diogelwch defnyddwyr drwy dynnu sylw at weithredoedd gwasanaethau – ac yn benodol drwy ddarparu tystiolaeth gadarn, am y tro cyntaf, am effaith eu mesurau diogelwch.

Mae diogelu plant ar-lein yn bwysicach nag erioed

O'i gymharu â'r llynedd, mae cyfran uwch o'r holl blant 5-7 oed yn defnyddio apiau/safleoedd i wneud pob un o'r gweithgareddau hyn:



2.23

Rydym hefyd yn gwybod bod gan ddefnyddwyr gwybodus a grymus ran allweddol i'w chwarae o ran hybu diogelwch ar-lein, a byddwn yn parhau â'n gwaith hirsefydlog i wella ymwybyddiaeth o'r cyfryngau drwy ein rhaglen Gwneud Synnwyr o'r Cyfryngau.

2.24

Wrth gyflawni ein gwaith i ddarparu 'Rydyn ni'n byw bywyd mwy diogel ar-lein', ceisiwn sicrhau'r canlyniadau canlynol i ddefnyddwyr:

- Sefydlu'r drefn Diogelwch Ar-lein i fod yn llwyddiant gyda'r bobl, y systemau, y prosesau a'r cysylltiadau cywir yn eu lle.
- Llywodraethu diogelwch cryfach mewn gwasanaethau ar-lein yn seiliedig ar ddealltwriaeth glir o risgiau.
- Gwasanaethau ar-lein wedi'u dylunio a'u gweithredu gyda diogelwch mewn golwg.
- Mwy o ddewis i ddefnyddwyr er mwyn iddynt gael rheolaeth ystyrlon dros eu profiadau ar-lein.
- Mwy o ymddiriedaeth yn y byd ar-lein drwy gael mwy o dryloywder o ran sut mae llwyfannau'n cadw defnyddwyr yn ddiogel – a beth mae Ofcom yn ei wneud i hybu newidiadau.

2.25

Dros y flwyddyn nesaf, bydd ein rhaglenni gwaith allweddol i gefnogi'r flaenoriaeth hon yn cynnwys:

- **Mynd i'r afael â niwed anghyfreithlon a diogelu plant ar-lein:** Unwaith y bydd y Cod Ymarfer Cynnwys Anghyfreithlon a'r Codau Ymarfer Amddiffyn Plant wedi'u cymeradwyo gan y Senedd, a'u bod wedi dod i rym, byddwn yn gallu cymryd camau gorfodi pan na fydd cwmnïau'n cymryd y camau angenrheidiol. Byddwn yn adeiladu ar y Codau cyntaf hyn dros amser, gan ddechrau gydag ymgynghoriad ar fesurau ychwanegol i ddiogelu defnyddwyr yng ngwanwyn 2025. Byddwn hefyd yn cwblhau ein canllawiau arfer gorau ar ddiogelu menywod a merched ar-lein ddiwedd 2025.
- **Sicrhau cydymffurfiaeth:** Rydym eisoes yn gweithio gyda gwasanaethau sy'n peri risgiau penodol i sicrhau eu bod yn cyflawni eu dyletswyddau newydd ac yn paratoui

ar gyfer ein rhaglenni gorfodi cychwynnol. Byddwn hefyd yn lansio rhaglenni cydymffurfio ehangach ar gyfer sawl gwasanaeth neu'r sector cyfan, lle credwn y gallai fod problemau systematig y mae angen gweithredu'n gyflym ac yn gynhwysfawr arnynt i gyflawni'r newid angenrheidiol. Rydym yn targedu gwasanaethau â risgiau yn ogystal â gwasanaethau mawr, ac yn gweithio gyda nhw i asesu a gwella eu mesurau diogelwch. Ar ben hynny, mae gennym raglen waith sydd wedi'i neilltuo i helpu pob gwasanaeth i ddeall a chyflawni ei ddyletswyddau a'i rwymedigaethau newydd.

- **Dyletswyddau ar wasanaethau wedi'u categorioiddio:** Byddwn yn dechrau sefydlu'r rheolau ar gyfer gwasanaethau wedi'u categorioiddio ar ôl cwblhau'r gofrestr, a disgwyliwn i hynny ddigwydd yn ystod haf 2025. Byddwn yn ceisio dechrau cyhoeddi hysbysiadau tryloywder drafft i wasanaethau yn fuan ar ôl cyhoeddi'r gofrestr o wasanaethau wedi'u categorioiddio, a chyhoeddi hysbysiadau tryloywder terfynol ar ôl hynny. Rydym yn disgwyl i'r adroddiadau tryloywder cyntaf sy'n orfodol yn ein hysbysiadau gael eu cyhoeddi gan wasanaethau tua diwedd 2025. Rydym hefyd yn anelu at gyhoeddi Codau Ymarfer drafft a chanllawiau drafft ynghylch dyletswyddau ychwanegol ar wasanaethau wedi'u categorioiddio erbyn dechrau 2026 fan bellaf.
- **Sefydlu'r drefn:** Rydym yn parhau i ddatblygu ein galluoedd technolegol a data, sydd eu hangen i gefnogi'r gwaith o reoleiddio'r drefn diogelwch ar-lein yn effeithiol. Ar ben hynny, fel gyda'n sectorau rheoledig eraill, bydd ffioedd y diwydiant yn ariannu cost rheoleiddio gwasanaethau ar-lein, ac rydym yn cymryd camau i ddechrau gweithredu'r [drefn ffioedd](#), gyda'r disgwyliad y bydd anfonebau'n cael eu cyhoeddi ar gyfer blwyddyn ariannol 2026/27.
- **Gweithio gyda phartneriaid:** Rydym yn parhau i weithio'n agos gyda rheoleiddwyr partner yn y DU fel rhan o'r Fforwm Cydweithredu ar Reoleiddio Digidol (DRCF), a chyda rheoleiddwyr rhyngwladol, gan gynnwys drwy'r Rhwydwaith Rheoleiddwyr Diogelwch Ar-lein Byd-eang (GOSRN) a'n cytundeb cydlynw â'r Comisiwn Ewropeaidd. Ein nod yw cysoni ein dulliau rheoleiddio a'n canllawiau lle bo hynny'n briodol, i hwyluso cydymffurfiaid cwmnïau â'r holl reolau perthnasol. Rydym hefyd yn datblygu proses uwch-gwynion y Ddeddf Diogelwch Ar-lein i alluogi endidau cymwys dynnu sylw at faterion systemig sy'n codi ar draws gwasanaethau, neu mewn amgylchiadau eithriadol, ar un gwasanaeth.

2.26 Rydym wedi bod yn rheoleiddio llwyfannau rhannu fideos yn y DU ers 2021. Mae'r rheolau ar y llwyfannau yn dal ar waith nes bydd y drefn yn cael ei [disodli gan y rheolau diogelwch ar-lein ehangach](#). Ym mis Ionawr 2024, fe wnaethom gyhoeddi ein [strategaeth wedi'i diweddarau](#) ar gyfer y drefn llwyfannau rhannu fideos a oedd yn crynhoi sut rydym wedi rheoleiddio gwasanaethau hyd yma, a'n blaenoriaethau ar gyfer gweddill y drefn. Gan edrych ymlaen at 2025/26, byddwn yn canolbwyntio ar y canlynol:

- **Newid i Ddiogelwch Ar-lein:** Byddwn yn parhau i gysoni blaenoriaethau'r llwyfannau rhannu fideos â'r blaenoriaethau strategol diogelwch ar-lein ar gyfer y tair blynedd nesaf. Byddwn yn sicrhau bod yr holl waith rydym yn ei wneud yn ystod gweddill y drefn llwyfannau rhannu fideos yn cysylltu'n uniongyrchol â'r drefn Diogelwch Ar-lein, ac yn paratoi llwyfannau rhannu fideos hysbysedig ar gyfer y newid.

- **Goruchwyllo llwyfannau:** Byddwn yn adeiladu ar y cysylltiadau goruchwyllo effeithiol rydym wedi'u meithrin gyda llwyfannau. Byddwn yn parhau i fynnu bod llwyfannau'n gwneud gwelliannau i'w gwasanaethau o dan reoliadau llwyfannau rhannu fideos, gan sicrhau eu bod yn cydymffurfio â'u dyletswyddau diogelwch ar-lein ac yn paratoi ar gyfer rheoleiddio diogelwch ar-lein.
- **Gorfodi:** Byddwn yn parhau i ddefnyddio ein hystod lawn o bwerau gorfodi i hyrwyddo cydymffurfiaid â'r drefn llwyfannau rhannu fideos.
- **Tryloywder y diwydiant:** Byddwn yn parhau, lle bo hynny'n briodol, i gyhoeddi allbynnau sy'n rhoi gwell dealltwriaeth o sut mae llwyfannau rhannu fideos yn cyflawni eu dyletswyddau o dan y drefn llwyfannau rhannu fideos.

2.27 Bydd Llywodraeth y DU yn pennu dyddiad ar gyfer diddymu'r rheolau llwyfannau rhannu fideos, y disgwylwn iddynt fod ar ôl i'r Codau Diogelwch ar-lein ar gyfer Amddiffyn Plant ddod i rym, yn ystod haf 2025. Bydd Ofcom yn helpu darparwyr llwyfannau rhannu fideos i symud i'r drefn Diogelwch Ar-lein.

Gwneud Synnwyr o'r Cyfryngau

- Ein gweledigaeth yw bod y DU yn wlad lle mae pobl yn meddu ar y sgiliau ymwybyddiaeth o'r cyfryngau sydd eu hangen arnynt, a lle mae gwasanaethau ar-lein a darlledwyr yn chwarae eu rhan i sicrhau bod pobl yn gallu llywio drwy'r cynnwys, a ffynnu'n ddiogel ar-lein. Mae ein dyletswyddau o ran ymwybyddiaeth o'r cyfryngau yn fwyaf perthnasol i'n blaenoriaethau o 'gyfryngau rydym yn ymddiried ynddynt ac yn eu gwerthfawrogi' a 'rydyn ni'n byw bywyd mwy diogel ar-lein', ond rydym yn gwybod eu bod yn cyffwrdd â'n holl sectorau.
- Mae ein strategaeth tair blynedd gyntaf ar ymwybyddiaeth o'r cyfryngau yn amlinellu sut rydym yn bwriadu gwneud ymwybyddiaeth o'r cyfryngau yn fusnes i bawb. Rydym wedi datblygu ein [strategaeth ymwybyddiaeth o'r cyfryngau](#) gan flaenoriaethu tair elfen ganolog:
- **Ymchwil, Tystiolaeth a Gwerthuso:** Mae hyn yn adeiladu ar ein treftadaeth ymchwil a chasglu tystiolaeth am realiti dyddiol oedolion a phlant, yn ogystal â'n hadnoddau gwerthuso a groesawyd.
- **Ymgysylltu â Llwyfannau:** Llwyfannau a gwasanaethau ar-lein, ochr yn ochr â darlledwyr, yw'r prif gyfrwng ar gyfer cyfathrebu a defnyddio'r cyfryngau. Mae ganddynt rôl bwysig i'w chwarae yn hybu ymwybyddiaeth o'r cyfryngau ar gyfer eu cynulleidfaoedd.
- **Pobl a Phartneriaethau:** Mae ymwybyddiaeth o'r cyfryngau yn ymwneud â phobl, a'r ffordd orau o sicrhau effaith yw drwy bartneriaid lleol dibynadwy sy'n arbenigo mewn cyflawni.

Galluogi gwasanaethau di-wifr yn economi'r DU



Mae'r flaenoriaeth hon yn ymwneud â sicrhau bod sbectrwm yn parhau i fod yn alluogwr effeithiol ar gyfer cyfathrebu di-wifr i bob person, busnes a sector. Rydym yn ceisio sicrhau bod sbectrwm yn parhau i gefnogi'r galw cynyddol am amrywiaeth o wasanaethau, yn galluogi arloesi ac, yn bwysicach, yn helpu twf economaidd.

- 2.28 Mae sbectrwm radio yn hanfodol i gyflawni amrywiaeth eang o dechnolegau a gwasanaethau di-wifr rydym yn eu defnyddio yn ein bywydau bob dydd, ac sy'n cynorthwyo busnesau a gwasanaethau cyhoeddus. Mae'r gwasanaethau hyn yn cynnwys cysylltiadau symudol, Wi-Fi, Bluetooth, radio wedi'i ddarlledu, teledu a llywio â lloeren. Ar ben hynny, mae'r sbectrwm yn parhau yn hanfodol i gefnogi'r gwasanaethau brys, monitro'r hinsawdd, rheoli traffig awyr a radar, a'n lluoedd arfog.



- 2.29 Gyda'r galw am sbectrwm radio gan ddefnyddwyr presennol a newydd yn parhau i gynyddu, ein nod yw sicrhau bod yr adnodd hanfodol hwn yn cael ei ddefnyddio'n effeithlon er budd pawb yn y DU. Yn benodol, byddwn yn cefnogi twf economaidd drwy hwyluso arloesedd mewn gwasanaethau symudol, lloeren a didrwydded (Wi-Fi). Byddwn yn gwneud hyn drwy alluogi mynediad amserol gyda dulliau awdurdodi hyblyg ac annog mwy o rannu rhwng gwahanol raglenni a defnyddiau.

2.30 Wrth ymgymryd â'n gwaith i 'Alluogi gwasanaethau di-wifr yn economi'r DU', rydym yn ceisio sicrhau'r canlyniadau canlynol:

- Sicrhau mynediad rhanddeiliaid at sbectrwm a lliniaru ymyriant niweidiol drwy drwyddedu, cynllunio, monitro a chydymffurfio sy'n galluogi gwasanaethau di-wifr.
- Canfod a darparu sbectrwm i ddiwallu anghenion newidiol sectorau, gan gynnwys band eang symudol a gwasanaethau gofod.
- Esblygu ein fframweithiau rheoli sbectrwm i gefnogi defnydd mwy effeithlon, gwella cyflymder a hyblygrwydd mynediad a gwella argaeledd sbectrwm.
- Arwain a dylanwadu ar drafodaethau rhyngwladol ar fynediad sbectrwm ar yr un pryd â chynrychioli buddiannau'r DU yn effeithiol.

2.31 Mae ein gwaith i gefnogi'r canlyniadau hyn yn canolbwyntio ar y meysydd gwaith canlynol:

- **Ymgysylltu rhyngwladol ar reoli sbectrwm:** Rydym yn cynrychioli buddiannau'r DU yng Nghynhadledd Radiogyfathrebu'r Byd (WRC) ac mewn gwaith sbectrwm Ewropeaidd i fynd ar drywydd canlyniadau rhyngwladol sy'n cyd-fynd â buddiannau'r DU. Drwy hyn, ein nod yw sicrhau bod dinasyddion a defnyddwyr yn gallu elwa o arloesi technolegol rhyngwladol ac ecosystemau cyfarpar wedi'u cysoni. Ein blaenoriaethau yw annog mwy o rannu rhwng gwahanol ddefnyddwyr a thechnolegau di-wifr; sicrhau sbectrwm digonol a digon o amddiffyniad i wasanaethau gwyddor y gofod; a gwella'r fframwaith rheoleiddio lloeren sy'n cefnogi arloesedd a thwf y sector.
- **Cefnogi arloesedd drwy sicrhau bod sbectrwm ar gael yn amserol a mwy o rannu:** Rydym am alluogi mynediad amserol at sbectrwm i gefnogi cystadleuaeth, arloesedd a thwf ar draws gwahanol sectorau. Rydym yn paratoi i ddyfarnu'r sbectrwm mmWave (26 a 40 GHz), gan ddylunio rheolau ar gyfer dyfarnu sbectrwm 1.4 GHz a pharhau i archwilio opsiynau awdurdodi ar gyfer y band 6GHz uchaf. Byddwn yn ymgynghori ar sicrhau bod mwy o sbectrwm ar gael i gefnogi mwy o gapasiti ar gyfer gwasanaethau lloeren drwy fynediad at fand Q/V ac E ar gyfer pyrth lloeren a mynediad ychwanegol at fand Ku a Ka ar gyfer terfynellau lloeren ar longau ac awyrennau. Gan weithio gyda Llywodraeth y DU, ein nod yw sicrhau bod sbectrwm ar gael ar gyfer seilwaith cenedlaethol hanfodol.
- **Effeithlonrwydd parhaus drwy alluoedd rheoli sbectrwm uwch:** Byddwn yn parhau â'n rhaglen waith i foderneiddio a gwella ein llwyfan trwyddedu i ddarparu mwy o awtomeiddio, gwella profiad defnyddwyr a chynyddu effeithlonrwydd sbectrwm.

2.32 Mae'r meysydd gweithgarwch hyn sydd â ffocws penodol yn cael eu hategu gan raglenni gwaith parhaus i gyflawni ein canlyniadau. Mae hyn yn cynnwys y canlynol:

- **Ymchwil a chynllunio:** Rydym yn cynnal mesuriadau ymledu radio ac offer radio i lywio ein gwaith datblygu polisi i wella effeithlonrwydd sbectrwm. Rydym yn parhau i ymgysylltu â defnyddwyr sbectrwm, cydweithwyr rhyngwladol, diwydiant, Llywodraeth y DU a'r byd academiaidd i ddeall newidiadau technolegol a newidiadau yn y farchnad a allai effeithio ar ofynion sbectrwm gwahanol ddefnyddwyr a

sectorau. Er enghraifft, rydym yn edrych ar ddulliau rhannu arloesol fel rhan o'n blwch tywod sbectrwm ac yn ystyried goblygiadau sbectrwm sy'n deillio o unrhyw benderfyniad yn y dyfodol ar deledu daearol digidol. Rydym hefyd yn gweithio gyda Llywodraeth y DU i alluogi mwy o rannu mewn sbectrwm amddiffyn.

- **Esblygu ein fframwaith rheoli sbectrwm:** Rydym yn adolygu ein fframwaith trwyddedu lloeren ar gyfer systemau lloeren nad ydynt yn ddaearsefydlog (NGSO) a'n polisi ffioedd trwyddedau porth lloeren, a byddwn yn ymgynghori ar ddiweddarau ein gweithdrefnau ffeilio lloerennau. Rydym hefyd yn bwriadu ymgynghori ar gyflwyno fframwaith rheoleiddio i alluogi gwasanaethau lloeren yn uniongyrchol i ffonau symudol, lle mae cytundeb â'r rheini sy'n dal trwyddedau sbectrwm symudol perthnasol. Rydym yn bwriadu diweddarau rhai o'n trwyddedau morol i symleiddio ac alinio â newidiadau i'r fframwaith rhwyngwladol. Rydym hefyd yn adolygu ffioedd trwyddedau sbectrwm symudol i sicrhau bod sbectrwm yn cael ei ddefnyddio'n effeithlon. Rydym yn parhau i symleiddio ein cynnyrch/prosesau trwydded lle bo hynny'n briodol er mwyn gwella effeithlonrwydd gweithredol.
- **Trwyddedu, cydymffurfio a sicrwydd:** Rydym yn rheoli tua 400,000 o drwyddedau sbectrwm byw sy'n cynnwys cynllunio amleddau ar gyfer trwyddedeion fel digwyddiadau arbennig, cysylltiadau sefydlog microdonfedd, mynediad a rennir, radio busnes, systemau lloeren nad ydynt yn ddaearsefydlog, darlledu radio a theledu; a darparu cyngor a chymorth i'r defnyddwyr sbectrwm hyn. Rydym yn ymchwilio i ymyriant niweidiol a defnydd anghyfreithlon/heb awdurdod o sbectrwm ac yn lleihau'r risg yma drwy gyfyngu ar argaeledd offer nad yw'n cydymffurfio.

3. Gwledydd

- 3.1 Mae angen i wasanaethau cyfathrebu weithio i bob person a busnes, ac er mwyn sicrhau hyn, rydym yn gweithio i ddeall y gwahanol anghenion ledled y DU. Mae heriau unigryw, ond hefyd cyfleoedd ar gyfer gwasanaethau cyfathrebu yng Nghymru, yr Alban, Gogledd Iwerddon a Lloegr. Mae hyn yn seiliedig ar ymchwil sy'n gynrychiolaeth genedlaethol ar draws holl wledydd a rhanbarthau'r DU. Dau o'r meysydd gwaith â blaenoriaeth ar gyfer timau gwledydd Ofcom yw sicrhau mynediad at wasanaethau telegyfathrebiadau o ansawdd da mewn ardaloedd gwledig, a sicrhau bod cynnwys ar gael sy'n adlewyrchu profiadau amrywiol pobl mewn gwahanol wledydd.
- 3.2 Mae ein Pwyllgorau Cynghori Cenedlaethol statudol yn ein helpu i ddeall a rhoi sylw i ddiddordebau a phryderon penodol yr holl randdeiliaid sy'n byw ac yn gweithio ym mhob un o'r pedair gwlad, ac integreiddio hyn yn ein gwaith polisi. Ar ben hynny, mae ein timau yng Nghaerdydd, Belfast, Caeredin, Llundain a Manceinion yn sicrhau bod gennym ddealltwriaeth eang o anghenion y DU, ond hefyd o amgylchiadau penodol defnyddwyr a rhanddeiliaid ym mhob gwlad. Mae gennym hefyd beirianwyr maes wedi'u lleoli ledled y DU i gefnogi ein gwaith sbectrwm, gan gynnwys yn Baldock a Birmingham.
- 3.3 Mae'r Memorandwm Cyd-ddealltwriaeth ym mhob gwlad yn sicrhau bod safbwyntiau a buddiannau rhanddeiliaid, defnyddwyr a chynulleidfaoedd yng Nghymru, yr Alban a Gogledd Iwerddon yn cael eu cynrychioli ar lefel y Bwrdd yn Ofcom, drwy gynnwys cyfarwyddwyr anweithredol sy'n cynrychioli buddiannau pob un o'r pedair gwlad. Byddwn yn parhau i ymgysylltu'n adeiladol â llofnodwyr pob Memorandwm Cyd-ddealltwriaeth, gan gynnwys y llywodraethau a'r seneddau perthnasol, wrth gyflawni ein blaenoriaethau ar gyfer 2025/26.
- 3.4 Mae safbwyntiau cynulleidfaoedd y DU hefyd yn cael eu cynrychioli ar Fwrdd Cynnwys Ofcom, sydd ag aelodau yn cynrychioli pob un o'r gwledydd. Mae gofyniad statudol hefyd i bob un o wledydd y DU fod â'i chynrychiolydd ei hun ar y Panel Defnyddwyr Cyfathrebiadau, sy'n tynnu sylw at anghenion pobl hŷn a phobl anabl, pobl mewn ardaloedd gwledig a phobl sydd ar incwm isel.
- 3.5 Bydd y gwaith a nodir yn ein blaenoriaethau uchod yn effeithio ar y DU gyfan, a bydd tîm pob gwlad yn gweithio i sicrhau bod anghenion unigryw pob gwlad yn cael eu cynrychioli wrth weithredu ein prosiectau. Isod, gallwch weld disgrifiad o'r prif feysydd gwaith a blaenoriaethau ar gyfer pob un o'n gwledydd.

Yr Alban

- 3.6 Mae ein blaenoriaethau telegyfathrebiadau yn yr Alban yn cynnwys ymgysylltu â rhanddeiliaid ar ein Hadolygiad o Fynediad Telegyfathrebiadau, wrth i ni barhau i ddarparu fframwaith rheoleiddio sefydlog sy'n cefnogi'r gwaith o gyflwyno cysylltedd sefydlog ffeibr llawn ac sy'n gallu delio â gigabits yn fasnachol ar draws yr Alban. Byddwn hefyd yn parhau i ddarparu mewnbyn a data, lle bo hynny'n briodol, i gefnogi'r gwaith o ddarparu rhaglenni presennol sy'n cael eu hariannu gan Lywodraeth y DU a Llywodraeth yr Alban – sefydlog a symudol – gan gynnwys Project Gigabit, Reaching 100 a'r Rhwydwaith Gwledig a Rennir.

- 3.7 Yn fwy cyffredinol, byddwn yn cynghori ar rôl technolegau eraill o ran datrys heriau cysylltedd mewn ardaloedd anghysbell, fel lloeren Orbit Isel y Ddaear a chysylltedd Uniongyrchol i Ddyfais. Gyda sector gofod a lloeren cynyddol yn yr Alban, bydd ein strategaeth sbectrwm gofod hefyd yn cefnogi ac yn galluogi arloesedd technegol.
- 3.8 Byddwn yn cydnabod buddiannau cymunedau gwledig ac ynysoedd yr Alban o ran cysylltedd fforddiadwy a chadarn, gan gynnwys monitro sut mae cyflwyno technolegau newydd yn yr Alban yn ategu'r broses o dynnu hen dechnolegau yn ôl, fel symud i wasanaethau Protocol Llais dros y Rhyngwrwd a diffodd gwasanaethau 3G a 2G.
- 3.9 Yn ein gwaith post, byddwn yn ymgysylltu â defnyddwyr, grwpiau busnes a rhanddeiliaid eraill ledled yr Alban wrth i ni ystyried diwygio i ddarparu gwasanaeth post cyffredinol.
- 3.10 Wrth i ni edrych ar sut gellir cynnal a chryfhau ansawdd darlledu gwasanaeth cyhoeddus drwy'r adolygiad o gyfryngau gwasanaeth cyhoeddus, byddwn yn ymgysylltu â Llywodraeth yr Alban, y diwydiant, y byd academaidd a rhanddeiliaid eraill fel rhan o'r broses. Byddwn yn canolbwyntio ar sicrhau bod hyn yn cael ei weithredu ar gyfer cynulleidfaoedd yn yr Alban ac yn ystyried yr ecoleg ddarlledu benodol yn yr Alban gyda deiliad trwydded Channel 3 gwahanol (o weddill y DU) ar ffurf STV, a rôl MG ALBA yn darparu cynnwys Gaeleg mewn partneriaeth â'r BBC.
- 3.11 Wrth gefnogi defnyddwyr i fyw bywyd mwy diogel ar-lein, byddwn yn parhau i ymgysylltu â Llywodraeth yr Alban i sicrhau bod y drefn diogelwch ar-lein yn cael ei rhoi ar waith yn ddidrafferth mewn cyd-destun datganoledig. Yn benodol, byddwn yn cydweithredu â Llywodraeth yr Alban ar ei nod o ddileu trais yn erbyn menywod a merched drwy weithio ar ddeall ac atal defnyddio technoleg i gyflawni'r trais hwn. Bydd cysylltiadau gweithio cryf yma hefyd yn helpu ein gwaith ein hunain i ddarparu Canllawiau ar amddiffyn menywod a merched rhag niwed ar-lein a fydd yn cael ei gwblhau yn ystod y flwyddyn.
- 3.12 Byddwn yn cryfhau ein partneriaethau â sefydliadau trydydd sector ledled yr Alban sy'n gweithredu ar lefel leol i hyrwyddo ymwybyddiaeth o'r cyfryngau. Byddwn yn gweithio gyda rhanddeiliaid yn yr Alban i annog datblygu mentrau ymwybyddiaeth o'r cyfryngau, yn enwedig gan ei fod yn ymwneud â'n hadolygiad o'r cyfryngau lleol a'n rhaglen Gwneud Synnwyr o'r Cyfryngau.

Cymru

- 3.13 Byddwn yn parhau i ymgysylltu â'r llywodraeth ar bob lefel yng Nghymru, gan sicrhau bod cynrychiolwyr etholedig a swyddogion yn cael eu hysbysu a'u cefnogi ar faterion ar draws cylch gwaith Ofcom, wedi'u harwain gan y Memorandwm Cyd-ddealltwriaeth rhwng Ofcom, Llywodraeth Cymru, y Senedd a Llywodraeth y DU. Byddwn yn darparu cyngor i helpu i lywio trafodaethau a phenderfyniadau polisi i sicrhau canlyniadau cadarnhaol i ddinasyddion a defnyddwyr Cymru. Ar ben hynny, byddwn yn gweithio gyda rheoleiddwyr eraill i rannu gwybodaeth ac arferion gorau ar draws sectorau drwy wahanol rwydweithiau, fforymau ac yn benodol, partneriaeth y Fforwm Cydweithredu ar Reoleiddio Digidol.
- 3.14 Byddwn yn parhau i fod yn gyfaill i'r Gymraeg, gan ymgysylltu â chymunedau Cymraeg eu hiaith i sicrhau bod eu materion penodol yn cael eu clywed a'u deall a bod y Gymraeg, lle bo hynny'n briodol, yn cael ei hystyried ym mhroses llunio polisiâu Ofcom. Rydym yn ymdrechu

i gyflawni ein dyletswyddau presennol i lefel uchel a byddwn yn parhau i adolygu ein prosesau a'n safonau i sicrhau canlyniadau llwyddiannus.

- 3.15 Wrth i Ofcom gael pwerau ffurfiol i reoleiddio darparwyr gwasanaethau ar-lein ar gyfer diogelwch ar-lein, byddwn yn gweithio'n agos gyda Llywodraeth Cymru, cymdeithas ddinesig, a grwpiau eiriolaeth defnyddwyr yng Nghymru i feithrin dealltwriaeth o'r drefn newydd a chefnogi ymdrechion i helpu pobl i fyw bywyd mwy diogel ar-lein. Mae'r Ddeddf Diogelwch Ar-lein wedi darparu mwy o eglurder a phenodolrwydd i'n dyletswyddau ymwybyddiaeth o'r cyfryngau³. Felly, byddwn yn gweithio gyda Llywodraeth Cymru ac eraill i gefnogi gwaith ymwybyddiaeth o'r cyfryngau yng Nghymru i helpu defnyddwyr i lywio drwy gynnwys yn ddiogel a ffynnu ar-lein.
- 3.16 Byddwn yn cefnogi gwell cysylltedd, yn enwedig yn yr ardaloedd anoddach eu cyrraedd yng Nghymru. Byddwn yn gwneud hyn drwy ymgysylltu'n rheolaidd â Llywodraeth Cymru, rhanddeiliaid telegyfathrebiadau a grwpiau eiriolaeth defnyddwyr, mewn perthynas â'r Adolygiad o Fynediad Telegyfathrebiadau ac ar faterion fel cyflwyno ffeibr llawn, band eang lloeren, gwell darpariaeth symudol a chadernid rhwydweithiau cyfathrebu, i sicrhau bod materion sy'n benodol i Gymru yn cael eu clywed a'u deall.
- 3.17 Byddwn yn cefnogi'r gwaith o weithredu'r Ddeddf Cyfryngau a'r Adolygiad o Gyfryngau Gwasanaeth Cyhoeddus gan sicrhau bod safbwyntiau'r sectorau darlledu, creadigol a chysylltiedig eraill yng Nghymru yn cael eu diweddarau, a'u bod yn rhan o'r prosesau ymgynghori.

Gogledd Iwerddon

- 3.18 Byddwn yn parhau i ymgysylltu â llywodraeth ar bob lefel yng Ngogledd Iwerddon, gan sicrhau bod cynrychiolwyr etholedig a swyddogion yn cael eu hysbysu a'u cefnogi ar faterion ar draws cylch gwaith Ofcom, wedi'u harwain gan y Memorandwm Cyd-ddealltwriaeth rhwng Ofcom, Gweithrediaeth Gogledd Iwerddon, y Cynulliad a Llywodraeth y DU. Byddwn yn darparu cyngor i helpu i lywio penderfyniadau polisi, gan arwain at ganlyniadau gwell i ddinasyddion a defnyddwyr yng Ngogledd Iwerddon. Ar ben hynny, byddwn yn gweithio gyda rheoleiddwyr eraill i rannu gwybodaeth ac arferion gorau ar draws sectorau drwy wahanol rwydweithiau, fforymau ac yn benodol, partneriaeth y Fforwm Cydweithredu ar Reoleiddio Digidol.
- 3.19 Byddwn yn cefnogi gwell cysylltedd yng Ngogledd Iwerddon drwy ymgysylltu'n rheolaidd â swyddogion y llywodraeth ar faterion fel cyflwyno ffeibr llawn, darpariaeth symudol a chadernid rhwydweithiau cyfathrebu; a byddwn yn parhau i ymgysylltu â rhanddeiliaid telegyfathrebiadau lleol a grwpiau eiriolaeth defnyddwyr i sicrhau bod materion sy'n benodol i Gogledd Iwerddon yn cael eu clywed a'u deall – yn enwedig drwy'r broses Adolygu Mynediad Telegyfathrebiadau a mudo PSTN a 2G/3G.
- 3.20 Gyda phwerau newydd Ofcom i reoleiddio darparwyr gwasanaethau ar-lein ar gyfer diogelwch ar-lein, byddwn yn gweithio'n agos gyda'r llywodraethu datganoledig a'r gymdeithas ddinesig yng Ngogledd Iwerddon, i hybu dealltwriaeth o'r drefn newydd a chefnogi ymdrechion i helpu pobl i fyw bywyd mwy diogel ar-lein. Byddwn yn gweithio gyda

³ Fel y nodwyd yn wreiddiol yn Neddf Cyfathrebiadau 2003.

sefydliadau lleol i ddylunio a gweithredu cynllun cyflawni ymwybyddiaeth o'r cyfryngau ar gyfer Gogledd Iwerddon, i helpu defnyddwyr lywio drwy gynnwys yn ddiogel a ffynnu ar-lein.

- 3.21 Fel rhan o'n Hadolygiad o Gyfryngau Gwasanaeth Cyhoeddus, byddwn yn sicrhau bod y diwydiant darlledu yng Ngogledd Iwerddon yn cael yr wybodaeth ddiweddaraf a'i gynnwys drwy gydol y broses ymgynghori, er mwyn sicrhau canlyniadau cadarnhaol i gynulleidfa oedd yng Ngogledd Iwerddon.
- 3.22 Byddwn yn gweithio'n agos gyda'n cymheiriaid rheoleiddio yng Ngweriniaeth Iwerddon – ComReg a Coimisiún na Meán – ac yn cynnig cyngor i Lywodraeth y DU a chyrff defnyddwyr y DU i sicrhau bod pobl a busnesau Gogledd Iwerddon yn parhau i elwa o berthynas drawsffiniol dda.
- 3.23 Fel rhan o'n hymrwymiad i hyrwyddo amrywiaeth a chynhwysiad yn ein sefydliad ac yn y sectorau ehangach rydym yn eu rheoleiddio, a sicrhau y cydymffurfir ag adran 75 o Ddeddf Gogledd Iwerddon 1998, byddwn yn cyhoeddi sut rydym yn bwriadu parhau i gyflawni ein dyletswyddau adran 75 mewn Cynllun Cydraddoldeb pum mlynedd newydd ar gyfer Gogledd Iwerddon.

Lloegr

- 3.24 Byddwn yn parhau i sicrhau bod anghenion cyfathrebu amrywiol pobl ledled Lloegr yn cael eu diwallu. Mae Pwyllgor Cyngori statudol Lloegr yn parhau i gefnogi penderfyniadau polisi Ofcom drwy nodi materion sy'n effeithio ar y sectorau cyfathrebu ym mhob rhan o'r wlad.
- 3.25 Mae ein hymrwymiad i gefnogi ecoleg cyfryngau amrywiol Lloegr, drwy sicrhau bod y cyfryngau'n gynhwysol ac yn adlewyrchu pob cynulleidfa, yn dal yn rhan hanfodol o'n gwaith. Rydym yn cydnabod pwysigrwydd cyfryngau lleol a byddwn yn darparu'r gofynion gwybodaeth a newyddion lleol newydd ar gyfer gorsafoedd radio analog.
- 3.26 Byddwn yn parhau â'n gwaith gyda'r llywodraeth, ASau lleol ac awdurdodau lleol i helpu cyflwyno ffeibr llawn ac i sicrhau mwy o ddarpariaeth symudol mewn ardaloedd gwledig. Yn ein hadroddiad Cysylltu'r Gwledydd blyneddol, rydym yn tynnu sylw at ein cynlluniau i ddefnyddio rhwydweithiau ffeibr i sicrhau gwasanaethau band eang cyflym i ddefnyddwyr, gan anelu at gynnwys 99% o eiddo trefol a 91% o eiddo gwledig erbyn mis Mai 2027.

4. Sut rydym yn cyflawni

- 4.1 Mae cydweithio y tu mewn a'r tu allan i Ofcom yn ein helpu i gyflawni ein hymrwymiaidau. Amlinellir isod ein hagwedd at bartneriaethau, ein gwaith sylfaenol a sut rydym yn gwneud y defnydd gorau o'n hadnoddau drwy fuddsoddi yn ein gallu sefydliadol.

Partneriaethau

- 4.2 Er mwyn bod yn rheoleiddiwr unedig effeithiol a chyflawni ar gyfer defnyddwyr a'n sectorau, rydym yn dibynnu fwyfwy ar amrywiaeth o bartneriaethau pwysig, yn ddomestig ac yn rhyngwladol.

Partneriaethau domestig

- **Parhau i weithio gyda rheoleiddwyr digidol eraill drwy'r Fforwm Cydweithredu ar Reoleiddio Digidol.** Byddwn yn parhau i weithio gyda'r Awdurdod Cystadleuaeth a Marchnadoedd, Swyddfa'r Comisiynydd Gwybodaeth a'r Awdurdod Ymddygiad Ariannol i gefnogi dull rheoleiddio cydlynol ar gyfer materion a gwasanaethau digidol. Mae aelodau'r Fforwm yn gweithio gyda'i gilydd ar Sganio'r Gorwel ac yn deall cyfleoedd a risgiau Deallusrwydd Artiffisial. Rydym hefyd yn gweithio'n arbennig o agos gyda Swyddfa'r Comisiynydd Gwybodaeth i sicrhau ein bod yn cyd-fynd â chyfraith diogelu data wrth i ni roi'r Ddeddf Diogelwch Ar-lein ar waith. Mae'r Fforwm wedi lansio Cais am Fewnbwn cyhoeddus, sy'n gofyn am safbwyntiau ynghylch pa feysydd y dylai eu blaenoriaethu yn ei gynllun gwaith blynyddol nesaf (2025/26), a gyhoeddir ym mis Ebrill 2025.
- **Rhwydwaith Rheoleiddwyr y Deyrnas Unedig.** Rydym yn gweithio gyda rheoleiddwyr eraill y DU i fynd i'r afael â heriau ar draws gwahanol sectorau, i rannu arferion gorau ac i sbarduno newid cadarnhaol fel aelod o'r Rhwydwaith. Mae'r Rhwydwaith hefyd yn ymgysylltu â rhanddeiliaid allanol i lywio a chyfrannu at ddadleuon polisi, adolygiadau rheoleiddio a materion traws-sector. Yn arbennig, byddwn yn parhau i gyfrannu at waith ar y cyd â'r Rhwydwaith i wella'r canlyniadau i ddefnyddwyr agored i niwed.
- **Ymgysylltu â'r gymuned academiaidd i helpu i ddatblygu ein sylfaen dystiolaeth.** Rydym yn canolbwyntio ar feithrin perthynas ag ymchwilwyr academiaidd i sicrhau bod gwaith Ofcom yn cael ei lywio gan y wybodaeth ddiweddaraf o ymchwil academiaidd, grwpiau arbenigol a sefydliadau cymdeithas sifil. Mae hyn yn arbennig o bwysig ar gyfer ein gwaith rheoleiddio diogelwch ar-lein, lle byddwn yn gweithio gydag amrywiaeth eang o randdeiliaid i sicrhau bod gennym y wybodaeth sydd arnom ei hangen i ddeall profiadau defnyddwyr ar-lein ac effaith mesurau diogelwch llwyfannau.
- **Parhau i weithio gyda'n cyd-reoleiddiwr, yr Awdurdod Safonau Hysbysebu.** Byddwn yn parhau â'n trefniadau cyd-reoleiddio ar gyfer teledu, radio, gwasanaeth rhaglenni ar-alw a llwyfannau rhannu fideos.

- **Panel Cyngori a Rhwydwaith Gwneud Synnwyr o'r Cyfryngau.** Ar hyn o bryd mae gan ein Rhwydwaith Gwneud Synnwyr o'r Cyfryngau 643 aelod sy'n cynrychioli amrywiaeth o sefydliadau'r DU ac yn rhyngwladol, gan gydweithio i wella ymwybyddiaeth o'r cyfryngau yn y DU. Mae ein Panel Cyngori yn llywio gwaith Ofcom i helpu i wella sgiliau, gwybodaeth a dealltwriaeth ar-lein oedolion a phlant y DU.
- **Canolfan Seiberddiogelwch Genedlaethol.** Byddwn yn parhau i weithio gyda'n hawdurdodau technegol, y Ganolfan Seiberddiogelwch Genedlaethol a'r Awdurdod Genedlaethol Diogelwch Amddiffynnol.
- **Gorfodi'r gyfraith a'r gymuned wybodaeth.** Byddwn yn parhau ein perthnasau gwaith â chyrrff gorfodi'r gyfraith a'r gymuned wybodaeth o ran ein cyfrifoldebau diogelwch ar-lein, diogelwch telegyfathrebiadau a'n cyfrifoldebau sbectrwm. Mae hyn yn cynnwys sefydliadau fel yr Asiantaeth Trosedd Genedlaethol, yr Heddlu Metropolitaidd, Heddlu Dinas Llundain, Heddlu'r Alban a'r Ganolfan Seiberddiogelwch Genedlaethol (NCSC).
- **Cynaliadwyedd a newid yn yr hinsawdd.** Mae gennym ddiddordeb yng nghynaliadwyedd hirdymor ein sectorau, ond ar hyn o bryd nid yw ein dyletswyddau'n cynnwys amcanion penodol ar gyfer newid yn yr hinsawdd. Rydym yn parhau i ymgysylltu â'r diwydiant telegyfathrebiadau i ddatblygu ei ddealltwriaeth o'r pwnc ac i gefnogi a chyfrannu at hyrwyddo amcanion sero net.

Partneriaethau rhyngwladol

- 4.3 Mae ein gwaith rhyngwladol yn parhau i esblygu wrth i'r gwasanaethau rydyn ni'n eu rheoleiddio weithredu'n fyd-eang, yn ogystal â'r llwyfannau maen nhw'n eu defnyddio i gyrraedd defnyddwyr. Mae ein gwaith rhyngwladol yn cynnwys cynrychioli Ofcom a'r DU yn rhanbarthol ac yn fyd-eang a defnyddio ein hymchwil sy'n seiliedig ar dystiolaeth i ddylanwadu ar bolisi ar lefel ryngwladol, gan ddod â gwybodaeth yn ôl i fod yn sail i'n gwaith yn ddomestig.
- 4.4 Rydym yn canolbwyntio ar ddatblygiadau rhyngwladol ym meysydd diogelwch ar-lein, darlledu, telegyfathrebiadau, marchnadoedd digidol, diogelwch a chadernid, a safonau technegol rhyngwladol. Mae ein gwaith arfaethedig ar gyfer 2025/26 yn cynnwys:

- O ran **diogelwch ar-lein**, byddwn yn parhau i ddatblygu ein cysylltiadau rhyngwladol, gan gyfnewid arferion gorau a phrofiad. Yn benodol, byddwn yn parhau i feithrin cydweithio ac yn eiriol dros normau cyffredin mewn diogelwch ar-lein, fel sylfaenwyr y Rhwydwaith Rheoleiddwyr Diogelwch Ar-lein Byd-eang, a thrwy'r Gweithgor Rhyngwladol ar Ddilysu Oedran. Byddwn hefyd yn parhau i weithio'n agos gyda'n cymheiriaid yn yr UE ar weithredu rheolau ar gyfer llwyfannau rhannu fideos a llwyfannau ar-lein eraill.
- Ym **maes darlledu a'r cyfryngau**, byddwn yn parhau i gymryd rhan yn y dadleuon byd-eang ar ymatebion rheoleiddio i sicrhau cynaliadwyedd cyfryngau gwasanaeth cyhoeddus. Byddwn yn parhau i ymgysylltu â rhwydweithiau fel Llwyfan Ewropeaidd o Awdurdodau Rheoleiddio, Tasglu Ewropeaidd ar Ymwybyddiaeth o'r Cyfryngau a Gwybodaeth a Chynghrair Ymwybyddiaeth o'r Cyfryngau a Gwybodaeth UNESCO, i

ddatblygu a chyfnewid arferion gorau ym maes ymwybyddiaeth o'r cyfryngau yn fyd-eang. Byddwn hefyd yn parhau â'n gwaith gyda sefydliadau fel Cyngor Ewrop i gydweithio â rheoleiddwyr darlledu a chyfryngau rhyngwladol eraill ar yr heriau cyffredin sy'n ein hwynebu.

- O ran **telegyfathrebiadau**, byddwn yn parhau i fonitro a dadansoddi technolegau sy'n dod i'r amlwg, datblygiadau rheoleiddio a deinameg y farchnad yn y sectorau cyfathrebiadau mewn awdurdodaethau allweddol, i'n helpu i nodi heriau, risgiau a chyfleoedd a allai effeithio ar sector telegyfathrebiadau'r DU. Byddwn yn parhau i weithio'n agos gyda chymheiriaid rhyngwladol ar sail ddwyochrog ac amlochrog, gyda'r Grŵp Rheoleiddwyr Annibynnol yn parhau i fod yn brif fforwm amlochrog i ni yn Ewrop. Byddwn hefyd yn cymryd rhan weithredol mewn mentrau rhyngwladol ad hoc eraill ar feysydd o ddiddordeb cyffredin, gan gynnwys Rhwydwaith Gorfodi Cyfathrebu Digymell a'r Fforwm Gwrth-dwyll Anffurfiol Byd-eang.
- Mewn perthynas â **marchnadoedd cyfathrebu ar y rhyngwrwyd**, byddwn yn monitro ac yn deall sut mae cystadleuaeth yn datblygu mewn awdurdodaethau eraill a allai ddylanwadu neu effeithio ar ein dyletswyddau a'n sectorau. Er enghraifft, rydym yn nodi ymddangosiad graddol rheoleiddio ex ante ar lwyfannau ar-lein yn fyd-eang, yn enwedig yn yr UE gyda'r Ddeddf Marchnadoedd Digidol. Gallai profiadau cyfundrefnau eraill o'r fath ddylanwadu ar ddyluniad ymyriadau o blaid cystadleuaeth yn y DU wrth i wahanol awdurdodaethau geisio rheoleiddio'r un set o lwyfannau digidol mawr yn unigol ac ar y cyd, ar gyfer yr un ymddygiad neu ymddygiad tebyg.
- Ym meysydd **diogelwch, cadernid rhwydwaith a safonau technegol**, mae gennym raglen barhaus o ymgysylltu dwyochrog â rheoleiddwyr a rhanddeiliaid eraill ledled y byd i rannu arbenigedd a diweddariadau ar ddatblygiadau yn ein gwledydd ein hunain. Mae Ofcom hefyd yn gweithio drwy'r Undeb Telegyfathrebiadau Rhyngwladol, lle rydym yn aelod etholedig o'i gyngor llywodraethu ac rydym yn cynrychioli'r DU yn y tri sector (telegyfathrebiadau, radiogyfathrebu a datblygu). Rydym hefyd yn gwasanaethu fel cadeirydd y prif bwyllgor sbectrwm a chadeirydd y pwyllgor paratoadol yng ngrŵp rhanbarth Ewrop. Rydym yn dilyn trafodaethau'n agos ar safonau technegol sy'n effeithio ar ein sectorau mewn sefydliadau safoni sy'n cael eu harwain gan y diwydiant, fel Tasglu Peirianeg Rhyngwrwyd, Sefydliad Safonau Telegyfathrebiadau Ewrop a Phrosiect Partneriaeth Trydedd Genhedlaeth.

Datblygu sgiliau a galluedd

4.5 Wrth i'n sectorau esblygu ac wrth i'n cylch gwaith ehangu, mae'n hanfodol ein bod yn parhau i fuddsoddi yn ein hased mwyaf gwerthfawr, ein pobl. Mae angen i ni addasu i gefnogi darpariaeth effeithiol ar draws pob maes o'n busnes. Rydym yn gwneud hyn drwy:

- **Datblygu ein swyddogaeth data a digidol:** Rydym yn parhau i ddatblygu ein gallu i fanteisio i'r eithaf ar dechnolegau sy'n seiliedig ar ddata a data ar draws ein sefydliad cyfan. Byddwn yn parhau i ddefnyddio technolegau sy'n seiliedig ar ddeallusrwydd artiffisial a dysgu peirianyddol lle mae angen a budd busnes clir, gan ddatblygu ein hatebion mewnol ein hunain ochr yn ochr â phrynu cynhyrchion parod lle bo

hynny'n briodol. Eleni, byddwn yn canolbwyntio ar wella'r ffordd rydym yn rheoli mwy a mwy o ddata cymhleth i sicrhau ei fod yn parhau i fod yn hygyrch, o ansawdd uchel ac yn cydymffurfio â'r holl ddeddfwriaeth berthnasol. I'n cydweithwyr, byddwn yn parhau i ddatblygu hyfforddiant i sicrhau'r cymysgedd cywir o sgiliau.

- **Cryfhau ein gallu technolegol:** Bydd technoleg bob amser yn chwarae rhan hollbwysig yn y gwaith o lunio'r galw, gan sbarduno tueddiadau defnyddwyr sy'n dod i'r amlwg a darparu gwasanaethau uwch i fusnesau ac i ddefnyddwyr fel ei gilydd. Rydym yn canolbwyntio'n benodol ar dechnolegau sy'n: galluogi darparu gwasanaethau newydd sy'n ddiogel i'w defnyddio ac sy'n cael eu gwerthfawrogi gan bobl a busnesau; gwella darpariaeth, perfformiad a chapasiti rhwydweithiau; lleihau'r rhwystrau i fynediad, rhoi mwy o ddewis i bobl; a sicrhau diogelwch a chadernid y gwaith o ddarparu gwasanaethau. Byddwn yn parhau i fuddsoddi yn ein galluoedd technegol drwy adeiladu ein gweithlu o arbenigwyr ar draws meysydd technolegol allweddol fel: Deallusrwydd artiffisial, realiti estynedig, gemau a thechnoleg diogelwch. Cefnogir ein harbenigedd gan ein hymgysylltiad parhaus â rhanddeiliaid, ein cyfranogiad mewn fforymau proffesiynol, ein rhyngweithio â chymunedau safonau a'n gwaith gyda phartneriaid y llywodraeth.
- **Meithrin dealltwriaeth fasnachol a sganio'r gorwel:** Rydym yn parhau i ddatblygu ein dealltwriaeth o'r sectorau rydym yn eu rheoleiddio a sut mae ein rhanddeiliaid a'n marchnadoedd yn esblygu. Rydym yn cyflawni hyn drwy recriwtio o amrywiaeth o gefndiroedd a meithrin sgiliau a gwybodaeth ymysg ein cydweithwyr. Mae ein rhaglen sganio'r gorwel yn fewnbwn allweddol arall i ddatblygu ein dealltwriaeth o'n sectorau wrth i ni geisio rhagweld datblygiadau a thueddiadau yn y dyfodol drwy ymgysylltu, ymchwil a dadansoddi allanol.
- **Strategaeth Amrywiaeth a Chynhwysiad:** Mae ein strategaeth Amrywiaeth a Chynhwysiad pum mlynedd yn dod i ben yn 2026. Yn ystod y cyfnod hwn, rydym wedi gwneud gwelliant sylweddol o ran cynrychiolaeth ar draws Ofcom. Rydym nawr yn gweithio tuag at darged newydd o 19% ar gyfer cynrychiolaeth uwch o gydweithwyr o leiafrifoedd ethnig, a tharged newydd o 15% ar gyfer cynrychiolaeth ar draws y sefydliad ar gyfer anabled. Byddwn yn parhau i wreiddio ein prosesau recriwtio cynhwysol newydd ac yn canolbwyntio ar wella profiadau cydweithwyr o gefndiroedd Du ac anabl. Rydym yn arbennig o falch o gael gwobr Cyflogwr y Flwyddyn y Sector Cyhoeddus yng Ngwobrau InsideOut ym mis Mehefin 2024, sy'n dathlu llwyddiannau yn y maes iechyd meddwl. Mae gennym raglen helaeth o weithgareddau i hyrwyddo lles meddyliol, corfforol, ariannol a chymdeithasol. Mae gwaith yn mynd rhagddo i bennu ein strategaeth y tu hwnt i 2026.
- **Strategaeth gweithio'n gysylltiedig:** Mae 26% o'n cydweithwyr wedi'u lleoli y tu allan i Lundain ac rydym yn disgwyl cyrraedd ein targed o 30% erbyn Mawrth 2026. Mae gwaith yn mynd rhagddo fel rhan o'n Cynllunio Gweithlu Strategol i bennu nodau'r dyfodol.

Bod yn sail i waith ehangach ar draws y sectorau rydym yn eu rheoleiddio

4.6 Mae Ofcom yn rheoleidiwr sy'n seiliedig ar dystiolaeth, ac rydym yn cael y dystiolaeth, yr wybodaeth a'r ddealltwriaeth sydd eu hangen arnom mewn amrywiaeth o ffyrdd ar draws ein sectorau, gan gynnwys:

- **Ymchwil i'r farchnad a gwybodaeth:** Rydym yn ymchwilio i farchnadoedd cyfathrebiadau a dewisiadau ac ymddygiad defnyddwyr er mwyn darparu dealltwriaeth drwyadl a chyfredol o bobl a busnesau. Rydym yn archwilio dulliau ymchwil arloesol gan gynnwys gwyddor ymddygiad, lle rydym wedi sefydlu Canolfan Deall Ymddygiad i feithrin dealltwriaeth ddyfnach o sut mae defnyddwyr yn gwneud penderfyniadau. Rydym yn cyfuno ein gwaith ymchwil am ddefnyddwyr â data, sy'n cael ei gasglu'n uniongyrchol gan y diwydiant a thrydydd partïon. Yn ogystal â llywio ein gwaith, mae ein hymchwil, a'n hymrwymiad i sicrhau bod y canfyddiadau ar gael yn gyhoeddus, yn cyflawni rhai o'n dyletswyddau statudol.
- **Peirianeg data a dadansoddi:** Mae gennym dimau sy'n cefnogi ein gwaith polisi a gweithredol drwy ddefnyddio data a dadansoddeg uwch. Rydym yn datblygu cynnyrch ac offer data i gynhyrchu gwybodaeth a helpu i wneud penderfyniadau mewn ffordd effeithiol ac effeithlon. Ochr yn ochr â hyn, rydym yn gweithredu fframwaith rheoli a llywodraethu data a gwybodaeth cynhwysfawr fel sylfaen ar gyfer ein defnydd o ddata o'r dechrau i'r diwedd.
- **Cipolwg ar dechnoleg:** Mae gan ein swyddogaethau technoleg bwrpas deuol o gynghori ein timau polisi, goruchwyllo a gorfodi i gyflawni eu blaenoriaethau presennol a gwneud gwaith blaengar i baratoi ar gyfer heriau yn y dyfodol. Rydym yn dyfnhau ein dealltwriaeth o sut mae technoleg yn sbarduno newid yn ein sectorau a'r effaith bosibl ar sut rydym yn gweithio, gan gynnwys ymgysylltu'n weithredol â'r byd academaidd i fanteisio ar arbenigedd ac ymchwil. Rydym hefyd yn cynnal profion manwl ac yn gwerthuso dulliau presennol a rhai sy'n dod i'r amlwg o ran diogelwch ar-lein yn ein Labordy Technoleg Diogelwch Ar-lein. Mae'r labordy hwn yn caniatáu ar gyfer archwilio atebion technegol penodol, fel y rheini mewn sicrhau oedran a chymedroli cynnwys awtomataidd.
- **Deallusrwydd Artiffisial:** Mae ein gwaith ar ddeallusrwydd artiffisial yn cael ei lywio gan ei ddefnydd ar draws ein holl sectorau a sut y gall effeithio ar y canlyniadau rheoleiddio rydym yn ceisio eu cyflawni ar draws ein cylch gwaith. Er enghraifft, byddwn yn edrych ymhellach ar rinweddau dulliau lliniaru ffugiad dwfn, fel dyfrnodau, cynlluniau metadata a labelu cynnwys. Byddwn yn parhau i ystyried effaith deallusrwydd artiffisial ar y sector cyfryngau, yn enwedig ar ddarparu newyddion cywir a dibynadwy fel rhan o'r adolygiad o gyfryngau gwasanaeth cyhoeddus. Byddwn hefyd yn parhau i ymgysylltu â chyrff safonau, yn enwedig Sefydliad Safonau Telegyfathrebiadau Ewrop ar Ddiogelu Deallusrwydd Artiffisial. Mae'n bwysig ein bod yn deall cyfleoedd a risgiau deallusrwydd artiffisial yn y dyfodol ar draws ein sectorau, a byddwn yn parhau i edrych ar ddatblygiadau drwy ein gweithgareddau sganio'r gorwel. Byddwn hefyd yn parhau i weithio gyda phartneriaid ein Fforwm Cydweithredu ar Reoleiddio Digidol ar ein diddordebau

cyffredin mewn deallusrwydd artiffisial, ac ymgysylltu â Llywodraeth y DU wrth iddi fwrw ymlaen â'i hagenda deallusrwydd artiffisial. Yn rhyngwladol, bydd Ofcom yn parhau i fonitro dadleuon polisi deallusrwydd artiffisial, gan ymgysylltu â rhanddeiliaid ledled y byd i ddeall defnydd ac effeithiau'r dechnoleg, a dilyn trafodaethau ar safonau deallusrwydd artiffisial mewn sefydliadau fel yr Undeb Telegyfathrebiadau Rhyngwladol, lle mae Ofcom yn cynrychioli'r DU. Rydym yn bwriadu cyhoeddi diweddariad i'n [cyhoeddiad Dull Strategol o ymdrin â Deallusrwydd Artiffisial](#) yn 2025/26.

4.7 Rydym hefyd yn awyddus i ddeall effaith ein gwaith ar ddefnyddwyr ac ar y sectorau rydym yn eu rheoleiddio. Rydym yn gwneud hyn mewn sawl ffordd, gan gynnwys:

- **Asesiadau effaith:** Rydym yn defnyddio asesiadau effaith yn unol â'n canllawiau diwygiedig i sicrhau bod ein dull o lunio polisiâu ar sail tystiolaeth yn glynu wrth yr arferion gorau. Rydym yn ystyried effeithiau ein hymyriadau ar amrywiaeth eang o ddinasyddion a defnyddwyr, gan gynnwys y rheini sydd â nodweddion gwarchoddedig, fel y nodir mewn deddfwriaeth cydraddoldeb. Ar ben hynny, rydym yn asesu'r effaith bosibl ar y Gymraeg. Rydym yn monitro ac, mewn achosion penodol fel hysbysiadau diwedd contract telegyfathrebiadau symudol, yn gwerthuso effaith go iawn ein gwaith ar ôl gweithredu, er mwyn deall sut mae ein hymyriadau wedi siapiau canlyniadau defnyddwyr. Mae'r gwerthusiad parhaus hwn yn ein galluogi i fireinio ein polisiâu ar sail canlyniadau gwirioneddol, yn hytrach na rhai a ragwelir. Pan fo'n briodol, rydym hefyd yn ystyried effaith ein gwaith rheoleiddio ar dwf economaidd, yn unol â'n Dyletswydd Twf statudol newydd.

- **Papurau Trafod:** Rydym yn annog trafodaeth ar bob agwedd ar reoleiddio cyfathrebiadau drwy ein papurau trafod parhaus. Maent hefyd yn cyfrannu at ein sylfaen dystiolaeth gadarn sy'n cefnogi ein penderfyniadau.
- **Casglu gwybodaeth:** Y Gofrestrfa Wybodaeth yw'r tîm sy'n cydlynu ein ceisiadau ffurfiol ac anffurfiol am wybodaeth ac sy'n gweithredu fel y prif bwynt cyswllt ar gyfer rhanddeiliaid y mae angen cymorth arnynt. Rydym yn buddsoddi mewn meddalwedd i'w gyflwyno yn y flwyddyn newydd a fydd yn symleiddio'r broses o gasglu gwybodaeth i randdeiliaid drwy ein Porth Cymunedol newydd. Mae ein hymrwymiad i wella'n barhaus o ran casglu gwybodaeth yn golygu ein bod wedi penderfynu sefydlu fforwm mewnol ar draws yr uwch Grŵp, i ddarparu rhagor o oruchwyliaeth ac atebolrwydd ar gyfer defnyddio ein pwerau casglu gwybodaeth. Ein bwriad yw y bydd yr uwch fforwm hwn, a gydlynir gan y Gofrestrfa, yn helpu i ystyried blaenoriaethu, cymesuredd a chwmpas ceisiadau. Rydym yn gweithio i gyhoeddi ein datganiad polisi Cyffredinol i roi rhagor o eglurder i randdeiliaid ynghylch sut byddwn yn gweithredu ein pwerau casglu gwybodaeth.

Sicrhau gwerth am arian

4.8 Mae Ofcom wedi ymrwymo i fod yn rheoleidiwr effeithlon ac effeithiol, gan chwilio'n barhaus am gyfleoedd i wella effeithlonrwydd. Ers Adolygiad o Wariant 2015, rydym wedi sicrhau arbedion termau real yn unol â'r sector cyhoeddus ehangach, gan gynnal ein cap

sylyfaenol gydag addasiad chwyddiant untro yn 2020/21. Mae hyn wedi lleihau cost go iawn rheoleiddio.

- 4.9 Rydym yn blaenoriaethu cynllunio strategol a chyllidebau integredig i ddefnyddio ein hadnoddau'n effeithiol. Mae buddsoddiadau'n cael eu rheoli'n dynn er mwyn bod mor effeithlon â phosibl, gan ddefnyddio caffael cystadleuol i sicrhau'r pris a'r ansawdd gorau posibl. Ein nod yw symleiddio ac awtomeiddio prosesau, fel parhau i awtomeiddio a digideiddio ein dull trwyddedu, sy'n gwella effeithlonrwydd ein hadnoddau a phrofiad defnyddwyr, a sicrhau ein bod yn defnyddio'r seilwaith presennol ar gyfer dyletswyddau newydd lle bo hynny'n bosibl (ee y Ddeddf Diogelwch Ar-lein a'r Ddeddf Cyfryngau). Ar ben hynny, rydym yn parhau i wneud y defnydd gorau posibl o'n hystâd ac rydym wedi parhau i gynyddu ein presenoldeb y tu allan i Lundain yn unol â'n strategaeth gweithio cysylltiedig, sydd yn ei dro wedi arwain at ddefnyddio ein hystâd yn fwy effeithlon dros y tair blynedd diwethaf.

Cap gwariant ar gyfer 2025/26

- 4.10 Mae Llywodraeth y DU yn sefydlu ein cap gwariant drwy'r Adolygiad o Wariant, sy'n llywio ein gwaith o gynllunio ein cyllideb. Wrth i ni nesáu at flwyddyn olaf y cylch Adolygu Gwariant presennol (2024/25), rydym yn trafod gyda DSIT a Thrysorlys Ei Fawrhdydi i bennu ein cap gwariant ar gyfer 2025/26. Ers 2021/22, mae ein cap gwariant wedi aros yr un fath, gyda dim ond cynnydd ar gyfer cyfrifoldebau newydd fel y Ddeddf Diogelwch Ar-lein, Deddf Telegyfathrebiadau (Diogelwch) 2021, Deddf y Cyfryngau a Hysbysebu Bwydydd Llai Iach.

A1. Beth rydym yn ei wneud

- A1.1 Sefydlwyd Ofcom gan Ddeddf y Swyddfa Gyfathrebiadau 2002, ac mae'n gweithredu'n unol â nifer o Ddeddfau Seneddol a deddfwriaeth arall. Rydym yn rheoleiddio telegyfathrebiadau llinell sefydlog a symudol, darlledu teledu a radio, gwasanaethau fideo ar-alw, y post a'r sbectrwm radio a ddefnyddir gan ddyfeisiau di-wifr, llwyfannau rhannu fideos a sefydlwyd yn y DU a diogelwch ar-lein o dan Ddeddf Diogelwch Ar-lein 2023.
- A1.2 Rydym yn gweithredu'n annibynnol ar lywodraethau a buddiannau masnachol i gyflawni ein dyletswyddau. Fodd bynnag, rydym yn atebol i'r Senedd ac, i gyflawni ein rôl yn effeithiol, mae angen i ni ymgysylltu'n agored ac yn adeiladol gyda Llywodraeth y DU a'r llywodraethau datganoledig. Rydym yn darparu cyngor technegol i lywodraethau (er enghraifft, ein hadroddiad diweddar i'r llywodraeth ar [ddyfodol dosbarthu teledu](#)) ac, mewn rhai achosion, rydym yn gweithredu fel cynrychiolydd ffurfiol Llywodraeth y DU (er enghraifft, mewn trafodaethau rhyngwladol ar sbectrwm).

Ein dyletswyddau

- A1.3 Mae Deddf Cyfathrebiadau 2003 (y "Ddeddf") yn gosod nifer o ddyletswyddau ar Ofcom y mae'n rhaid i ni eu cyflawni wrth weithredu'r swyddogaethau a'r pwerau rheoleiddio a roddwyd i ni. Mae'r Ddeddf yn datgan mai ein prif ddyletswydd o ran cyflawni ein swyddogaethau yw hybu buddiannau dinasyddion yng nghyswllt materion yn ymwneud â chyfathrebiadau a defnyddwyr mewn marchnadoedd perthnasol, drwy hyrwyddo cystadleuaeth lle bo hynny'n briodol. Gyda gwasanaethau post, mae gennym ddyletswydd i gyflawni ein swyddogaethau mewn ffordd a fydd, yn ein barn ni, yn diogelu'r gwasanaeth post cyffredinol yn y Deyrnas Unedig.
- A1.4 Wrth gyflawni ein dyletswyddau mae'n rhaid i ni ystyried yr egwyddorion sy'n datgan y dylai gweithgareddau rheoleiddio fod yn dryloyw, yn atebol, yn gymesur, yn gyson ac wedi'u targedu dim ond at achosion lle mae angen cymryd camau, yn ogystal ag unrhyw egwyddorion eraill sy'n ymddangos i ni fel rhai sy'n cynrychioli'r ymarfer rheoleiddio gorau.⁴
- A1.5 Wrth arfer rhai swyddogaethau rheoleiddio, mae'n rhaid i'n dyletswyddau gynnwys ystyried pa mor ddymunol yw hybu twf economaidd.⁵ Cyfeirir at y ddyletswydd hon fel y "ddyletswydd twf" ac mae'n cyd-fynd yn benodol â'n dyletswyddau i ystyried pa mor ddymunol yw: hyrwyddo cystadleuaeth mewn marchnadoedd perthnasol; annog buddsoddiad ac arloesedd mewn marchnadoedd perthnasol; ac annog argaeledd a defnydd gwasanaethau trosglwyddo data cyflymder uchel ledled y DU.

⁴ Gweler adran 3(1) o'r Ddeddf.

⁵ Mae'r ddyletswydd twf o dan adran 108(1) o Ddeddf Dadreoleiddio 2015 yn berthnasol i sut mae Ofcom yn gweithredu ei "swyddogaethau rheoleiddio" (fel y'u diffinnir yn adran 111), ond mae hyn yn amodol ar eithriadau penodol.

A1.6 Rydym yn gweithredu ac yn gorfodi cyfreithiau'n ymwneud â diogelu defnyddwyr, cyfathrebiadau, a chystadleuaet; mae ein pwerau cystadleuaeth yn cael eu hamlinellu yn nes ymlaen yn yr atodiad hwn.

Ein prif ddyletswyddau cyfreithiol sy'n llywio cyfeiriad ein gwaith

A1.7 Mae ein prif ddyletswyddau cyfreithiol wrth gyflawni ein gwaith yn cynnwys sicrhau:

- bod gan y Deyrnas Unedig amrywiaeth eang o wasanaethau cyfathrebu electronig;
- y gwneir y defnydd gorau posibl o'r sbectrwm radio;
- bod amrywiaeth eang o raglenni radio a theledu o safon yn cael eu darparu gan nifer o sefydliadau gwahanol, sy'n apelio at amrywiaeth o ddiddordebau a chwaethau;
- cynnal yr amrywiaeth o ddarparwyr gwasanaethau teledu a radio gwahanol sydd ar gael;
- bod pobl yn cael eu diogelu rhag deunydd niweidiol neu ymosodol, triniaeth annheg, ac ymyrraeth ar breifatrwydd ar y radio a'r teledu heb gyfiawnhad;
- sicrhau bod digon o amddiffyniad i ddinasyddion rhag niwed a achosir gan gynnwys ar-lein ar wasanaethau a reoleiddir, drwy sicrhau bod darparwyr gwasanaethau o'r fath yn gwneud defnydd priodol o systemau a phrosesau sydd wedi eu dylunio i leihau'r risg o niwed o'r fath;
- bod y BBC yn cael ei ddal i gyfrif am ei gydymffurfiaeth â safonau cynnwys priodol, ei berfformiad yn erbyn ei Genhadaeth a'i Ddiben Cyhoeddus, ac effaith ei weithgareddau ar gystadleuaeth deg ac effeithiol; a
- bod y rhwymedigaeth gwasanaeth cyffredinol ar wasanaethau post yn cael ei diogelu yn y DU.

A1.8 Ers 2020, Ofcom sy'n gyfrifol am sicrhau bod llwyfannau rhannu fideos a sefydlwyd yn y Deyrnas Unedig yn cymryd camau priodol i ddiogelu defnyddwyr sy'n defnyddio'r gwasanaethau hynny rhag y perygl o wyllo cynnwys niweidiol.

Ar 1 Hydref 2022, dechreuodd y drefn reoleiddio a sefydlwyd gan Ddeddf Telegyfathrebiadau (Diogelwch) 2021 yn ffurfiol. Mae hyn yn gosod dyletswyddau diogelwch cryfach ar ddarparwyr telegyfathrebiadau, gyda phwerau gan y Llywodraeth i nodi gofynion diogelwch, ac yn rhoi cyfrifoldebau ar Ofcom i sicrhau bod darparwyr yn cydymffurfio.

Ym mis Tachwedd 2023, cafodd y Ddeddf Diogelwch Ar-lein gydsyniad Brenhinol a chafodd Ofcom ei benodi'n rheoleiddiwr diogelwch ar-lein y DU.

Gall Ofcom orfodi cyfraith defnyddwyr ar ran defnyddwyr ond nid oes ganddo'r pŵer i ddatrys cwynion defnyddwyr unigol ynghylch gwasanaethau post a thelegyfathrebiadau, yn wahanol i'w bwerau gyda theledu a radio. Pan fo'n briodol, rydym yn darparu cyngor i'r rhai sy'n cwyno ac yn eu cyfeirio at gynlluniau amgen o ddatrys anghydfod rydym wedi'u cymeradwyo.

Pwerau Ofcom o dan y gyfraith cystadleuaeth

- A1.9 Yn ogystal â'n cyfrifoldebau rheoleiddio a nodir uchod, mae gennym bwerau yng nghyswllt materion cyfathrebiadau i wneud y canlynol:
- gorfodi'r gwaharddiadau ar gytundebau gwrth-gystadleuol a chamddefnyddio safle goruchafol, a nodir yn Neddf Cystadleuaeth 1998;
 - ymchwilio i farchnadoedd a chyfeirio materion o dan Ddeddf Menter 2002 at yr Awdurdod Cystadleuaeth a Marchnadoedd; a
 - rhoi adroddiad i'r Ysgrifennydd Gwladol o dan adran 44A o Ddeddf Menter 2002 mewn perthynas ag uno cyfryngau.
- A1.10 Byddwn yn ystyried a yw'n fwy priodol arfer pwerau Deddf Cystadleuaeth 1998 neu'r pwerau sectoraidd mewn unrhyw achos penodol, yn amodol ar ofynion deddfwriaethol penodol.

A2. Atodiad i'r Prosiect

Rhyngwrwyd a phost y gallwn ddibynnu arnynt

Manylion y Prosiect	Cerrig Milltir
Adolygiad o Fynediad Sefydlog Telegyfathrebiadau. Bydd yr Adolygiad o Fynediad Telegyfathrebiadau 2026 yn adolygu'r prif farchnadoedd telegyfathrebiadau sefydlog yn y DU ac yn rhoi rheoliadau ar waith a fydd yn berthnasol am 5 mlynedd o 1 Ebrill 2026.	Datganiad Ch4 ⁶ 2025/26
Rheoleiddio Telegyfathrebiadau yn Ardal Hull. Byddwn yn adolygu'r prif farchnadoedd telegyfathrebiadau sefydlog yn Ardal Hull ac yn rhoi rheoliadau ar waith a fydd yn berthnasol am 5 mlynedd o 1 Tachwedd 2026.	Ymgynghoriad Ch3 2025/26
Adolygiad o'r farchnad llais cyfanwerthol. Byddwn yn adolygu ein gwaith o reoleiddio terfynu galwadau sy'n cefnogi darparu gwasanaethau ffôn llinell dir a symudol yn y DU, a byddwn yn cynnig rhoi rheoliadau ar waith a fydd yn berthnasol am 5 mlynedd o 1 Ebrill 2026 ymlaen.	Ymgynghoriad Ch1 2025/26 Datganiad Ch4 2025/26
Adolygiad marchnad terfynu SMS A2P cyfanwerthol. Byddwn yn cyhoeddi datganiad yn dilyn ein hymgyngoriad arfaethedig yn gynnar yn 2025, lle gallwn wneud cynigion i reoleiddio'r farchnad terfynu SMS A2P cyfanwerthol, o ystyried ein pryderon cystadleuaeth am y negeseuon swmp sy'n cael eu hanfon gan fusnesau a chyrrff cyhoeddus.	Datganiad Ch2 2025/26
Rhaglen datblygu polisi Diogelwch a Chadernid. Byddwn yn ymgysylltu â Llywodraeth y DU drwy ddrafftio a phasio'r Bil Seiberddiogelwch a Chadernid yn seneddol. Byddwn yn monitro ac yn paratoi ar gyfer gwelliannau a gwaith ehangu yn ein cyfrifoldebau rheoleiddio, a byddwn yn parhau i weithio gyda'r Llywodraeth ac yn adrodd ar rwymedigaethau o dan y Ddeddf Diogelwch Telegyfathrebiadau a'r Rheoliadau Diogelwch Gwybodaeth Rhwydwaith.	Adroddiad Ch3 2025/26
Deddf Diogelwch Telegyfathrebiadau gan gynnwys y drefn ddiogelwch, Gwerthwyr Risg Uchel a TBEST. Byddwn yn mynd ati i fonitro cydymffurfedd darparwyr cyfathrebu â'u rhwymedigaethau rheoleiddio diogelwch. Byddwn yn parhau i ymgysylltu â'r diwydiant i gynnal ein profion bygythiadau TBEST sy'n seiliedig ar wybodaeth (profion treiddio).	Parhaus
Darpariaeth symudol. Byddwn yn parhau i wella'r broses o adrodd ar berfformiad a darpariaeth symudol. Byddwn yn dal y gweithredwyr rhwydweithiau symudol i gyfrif am gywirdeb eu hadroddiadau. Bydd dulliau newydd a ffynonellau data hefyd yn cael eu dadansoddi.	Parhaus

⁶ Defnyddir chwarteri ariannol drwy'r Cynllun Gwaith

Teitlau Byd-eang a Diogelwch Rhwydwaith Symudol. Byddwn yn ystyried a ddylid gweithredu unrhyw newidiadau i reolau i'r defnydd o Deitlau Byd-eang i sicrhau bod gweithredwyr gwael yn cael eu hatal rhag defnyddio'r rhwydwaith signalau symudol byd-eang, a monitro gweithrediad unrhyw newidiadau o'r fath.

Parhaus

Diffodd 2G/3G. Byddwn yn parhau i weithio gyda gweithredwyr symudol a darparwyr gwasanaethau eraill sy'n dibynnu ar rwydweithiau 2G/3G i gefnogi'r broses o ddiffodd rhwydweithiau. Ein nod yw helpu i leihau unrhyw darfu yn ystod y broses ddiffodd a helpu i ddiogelu cwsmeriaid rhag niwed, yn enwedig y rheini sy'n agored i niwed.

Parhaus

Diffodd PSTN. Byddwn yn parhau i weithio gyda darparwyr cyfathrebiadau a'r llywodraeth i sicrhau bod y materion a godwyd drwy eu mudo i linellau tir digidol, gan gynnwys y broses o ddiffodd y rhwydwaith ffôn cyfnewidfa gyhoeddus (PSTN) sy'n mynd rhagddo, yn cael eu nodi ac yn cael sylw gyda'r nod o ddiogelu defnyddwyr rhag niwed ac amharu cyn lleied â phosibl arny'n nhw.

Parhaus

Adolygiad Dulliau Amgen o Ddatrys Anghydfod. Adolygiad strategol o sut mae mynediad at Ddulliau Amgen o Ddatrys Anghydfod a phrofiad cwsmeriaid drwy'r broses yma yn gweithio. Y nod yw sicrhau bod y rheolau sydd gennym ar gyfer darparwyr yn parhau i fod yn effeithiol ac ystyried ail-gymeradwyo'r ddau gynllun Dulliau Amgen o Ddatrys Anghydfod o dan y Ddeddf Cyfathrebiadau.

Datganiad
Ch1 2025/26

Cynllun achredu Offer Cymharu Digidol. Byddwn yn parhau i ddarparu goruchwyliaeth reoleiddiol i gynllun achredu gwirfoddol Ofcom ar gyfer Offer Cymharu Digidol, gan sicrhau bod defnyddwyr yn gallu cymharu rhwng gwahanol ddarparwyr. Mae hyn yn cynnwys cynnal archwiliadau rheolaidd i sicrhau bod y safle(oedd) yn gweithio'n dda, a bod y wybodaeth a ddarperir yn hygyrch, yn gywir ac yn gyfredol.

Parhaus

Diogelu defnyddwyr agored i niwed. Byddwn yn parhau i fonitro a yw darparwyr, gan gynnwys darparwyr llai, yn trin cwsmeriaid sydd mewn amgylchiadau bregus yn deg, a'u bod yn derbyn y cymorth a'r gwasanaethau sydd eu hangen arnynt. Byddwn hefyd yn parhau i weithio â Rhwydwaith Rheoleiddwyr y DU i wella canlyniadau i ddefnyddwyr agored i niwed.

Parhaus

Fforddiadwyedd. Byddwn yn parhau i fonitro ac adrodd ar ddangosyddion fforddiadwyedd ar gyfer gwasanaethau cyfathrebu bob chwarter. Byddwn yn cyhoeddi adroddiad ar argaeledd tariffau cymdeithasol a ffigurau defnydd fel rhan o'r adroddiad ar dueddiadau prisio.

Adroddiad
Ch3 2025/26

Adrodd ar dueddiadau prisio mewn gwasanaethau cyfathrebu. Byddwn yn cyhoeddi ein hadroddiad blynyddol sy'n olrhain y prisiau y mae defnyddwyr gwasanaethau telegyfathrebiadau a theledu drwy dalu yn eu talu.

Adroddiad
Ch3 2025/26

Cymharu gwasanaethau i gwsmeriaid. Byddwn yn cyhoeddi adroddiad gan edrych ar ansawdd y gwasanaeth a ddarperir i gwsmeriaid preswyl gan ddarparwyr telegyfathrebiadau sefydlog a symudol.

Adroddiad
Ch1 2025/26

Monitro cydymffurfiad â rheolau Diogelu Defnyddwyr. Byddwn yn parhau i sicrhau bod ein hymyriadau diogelu defnyddwyr a'n mentrau gwirfoddol yn cael eu rhoi ar waith yn briodol, a'u bod yn cael effaith gadarnhaol ar ddefnyddwyr.

Parhaus

Polisi dyfodol rhifo. Byddwn yn parhau â'n hadolygiad strategol o'r cynllun rhifau ffôn i sicrhau ei fod yn darparu'r hyn mae defnyddwyr yn ei ddeall, a'r hyn mae arnyn nhw ei eisiau a'i angen gan rifau ar gyfer y degawd nesaf.

Parhaus

Adolygiad Mynediad 080 a 116. Rydym yn cynnal adolygiad o'r amodau mynediad roeddem wedi'u gosod mewn perthynas â tharddiad galwadau cyfanwerthol ar gyfer rhifau 080 a 116 am ddim, er mwyn deall canlyniadau gosod yr amodau ac ystyried a ddylid eu haddasu neu eu dirymu.

Ymgynghoriad
Ch2 2025/26
Datganiad
Ch3 2025/26

Arallgyfeirio Gwerthwyr Telathrebu. Byddwn yn parhau i alluogi gwerthwyr mwy newydd i brofi technoleg mewn amgylchedd sy'n fasnachol niwtral drwy lwyfan profi rhwydwaith mynediad radio agored Labordai Canolfan Rhyngweithredu Rhwydwaith Agored SmartRAN. Byddwn hefyd yn parhau i rannu ein gwybodaeth a'n harbenigedd gyda Llywodraeth y DU ar faterion arallgyfeirio, gan gynnwys Lab Telegyfathrebiadau'r DU.

Adroddiad
Ch1 2025/26

Cysylltu'r Gwledydd. Byddwn yn cynhyrchu ein hadroddiad blynyddol ar gyfer y DU ac adroddiad y pedair gwlad ym mis Tachwedd, sy'n ymwneud â rhwydweithiau sefydlog a symudol a diogelwch / cadernid rhwydweithiau. Byddwn hefyd yn cynhyrchu diweddariad canol blwyddyn a diweddariad ar ddata cyflwyno rhwydwaith arfaethedig.

Adroddiad
Ch1 2025/26
& Ch3 2025/26

Monitro niwtraliaeth y rhyngrwyd. Byddwn yn cyhoeddi adroddiad blynyddol ar ein gwaith o fonitro'r rheoliadau rhyngrwyd agored. Bydd hyn yn cynnwys y wybodaeth ddiweddaraf am ansawdd cyffredinol band eang a brofir gan ddefnyddwyr yn ogystal ag unrhyw broblemau o ran cydymffurfio â'r rheolau gan ddarparwyr gwasanaethau rhyngrwyd.

Adroddiad
Ch3 2025/6

Datblygu'r Rhwymedigaeth Gwasanaeth Cyffredinol y post yn y dyfodol. Byddwn yn cyhoeddi ymgynghoriad manwl yn Ch4 2024/25 ar gynigion i ddiwygio Rhwymedigaeth Gwasanaeth Cyffredinol y post, gan gydnabod yr angen brys i sicrhau cynaliadwyedd y gwasanaeth, a pharhau i ddiwallu anghenion defnyddwyr ar yr un pryd. Dilynir hyn gan ddatganiad penderfyniad ar unrhyw newidiadau i'r USO.

Datganiad
Ch2 2025/26

Monitro'r Post Brenhinol. Byddwn yn parhau i fonitro effaith canllawiau a rhwymedigaethau yn y farchnad parseli ar gyfer delio â chwynion a thrin cwsmeriaid anabl. Byddwn yn parhau i fonitro cynnydd effeithlonrwydd y Post Brenhinol yn well a chynaliadwyedd tymor hir Rhwymedigaeth Gwasanaeth Cyffredinol ar gyfer y post. Yn ogystal â pharhau i adrodd ar ddata'r farchnad, ymchwil defnyddwyr a pherfformiad ariannol ac effeithlonrwydd y Post Brenhinol yn ein hadroddiad monitro post blynyddol.

Adroddiad
Ch3 2025/26

Cyfyngau rydym yn ymddiried ynddynt ac yn eu gwerthfawrogi

Manylion y Prosiect	Cerrig Milltir
<p>Deddf Cyfyngau. Byddwn yn parhau i weithio tuag at yr amserlenni sydd wedi'u nodi yn ein map sydd wedi'i gyhoeddi ar sut byddwn yn gweithredu'r Ddeddf Cyfyngau ac yn paratoi ar gyfer ein dyletswyddau newydd ar draws gwahanol fannau rheoleiddio. Bydd hyn yn cynnwys amrywiaeth o ymgynghoriadau, datganiadau, adroddiadau ac amrywiadau i drwyddedau yn 2025/26. Mae adran gweithredu'r Ddeddf Cyfyngau ar wefan Ofcom yn rhoi diweddariadau rheolaidd i randdeiliaid wrth i ni fwrw ymlaen â'n gwaith. Mae rhagor o wybodaeth ar gael ar gyfer pob rhan o'n gwaith isod.</p>	Parhaus
<p>Rhan 1a: Diwygio darlledu gwasanaeth cyhoeddus y Ddeddf Cyfyngau. Yn dilyn ymgynghoriadau ddechrau 2025, byddwn yn cyhoeddi canllawiau ar gyfer datganiadau polisi rhaglenni a chanllawiau ar gwotâu a chomisiynu gan gynhyrchwyr annibynnol yn Ch2 2025/26.</p>	Ymgynghoriad Ch1 2025/26 Datganiad Ch2 2025/26
<p>Rhan 1b: Digwyddiadau Rhestredig y Ddeddf Cyfyngau. Byddwn yn cyhoeddi ymgynghoriad ar ein cynigion ar gyfer gweithredu'r newidiadau i'r drefn Digwyddiadau Rhestredig a wnaed gan Ddeddf Cyfyngau 2024, gan ddilyn gyda datganiad.</p>	Ymgynghoriad Ch1 2025/26 Datganiad Ch3 2025/26
<p>Rhan 2: Argaeledd ac Amlygrwydd Deddf Cyfyngau. Byddwn yn cynghori'r Ysgrifennydd Gwladol ynghylch pa lwyfannau ddylai fod o fewn cwrpas y drefn amlygrwydd ac argaeledd newydd o dan y Ddeddf Cyfyngau. Bwriadwn ymgynghori i fod yn sail i'n cyngor terfynol i'r Ysgrifennydd Gwladol.</p>	Ymgynghoriad Ch1 2025/26 Datganiad Ch2 2025/26
<p>Rhan 2: Argaeledd ac Amlygrwydd Deddf Cyfyngau. Mae'n rhaid i ni hefyd ddynodi'r gweithredwyr darlledu gwasanaeth cyhoeddus masnachol sydd o fewn cwrpas y drefn newydd. Rydym yn bwriadu cyhoeddi ein datganiad ar y fethodoleg y byddwn yn ei defnyddio i bennu dynodiad gweithredwyr darlledwyr gwasanaeth cyhoeddus yn Ch1 2025/26, a chyhoeddi ein penderfyniadau dynodi terfynol mewn datganiad yn Ch4 2025/26.</p>	Datganiad Ch1 2025/26 Datganiad Ch4 2025/26
<p>Rhan 2: Argaeledd ac Amlygrwydd Deddf Cyfyngau. Rydyn ni'n bwriadu ymgynghori ar ein codau ymarfer ar sut gall llwyfannau gydymffurfio â'u gofynion amlygrwydd a hygyrchedd newydd yn ogystal â chanllawiau cysylltiedig yn Ch3 2025/26. Byddwn yna'n cyhoeddi ein hadroddiad yn Ch4 2025/26.</p>	Ymgynghoriad Ch3 2025/26 Datganiad Ch4 2025/26
<p>Rhan 3: Polisi comisiynu Channel 4 y Ddeddf Cyfyngau. Byddwn yn ymgynghori ar ganllawiau i Channel 4 ar baratoi ei ddatganiad polisi comisiynu a fydd yn berthnasol pan fydd yn sefydlu busnes cynhyrchu.</p>	Ymgynghoriad Ch2 2025/26

Rhan 4a: Cod Fideo Ar-alw y Ddeddf Cyfryngau. Byddwn yn paratoi adroddiad ar weithrediad y farchnad fideo ar-alw yn y DU, gan ymateb i gais gan yr Ysgrifennydd Gwladol ym mis Medi. Rhaid i'r Ysgrifennydd Gwladol ystyried cynnwys adroddiad Ofcom cyn gwneud rheoliadau sy'n pennu'r gwasanaethau sydd wedi'u dynodi'n wasanaethau 'Haen 1'. Byddwn yn ymgysylltu â darparwyr mwy cyn paratoi'r adroddiad ar y farchnad.

Adroddiad
Ch1 2025/26
Ymgynghoriad
Ch2 2025/26

Adolygiad o fesurau diogelu cynulleidfaoedd fideo ar-alw. Cyn y Cod Fideo Ar-alw, byddwn hefyd yn adolygu'r mesurau diogelu cynulleidfaoedd sydd gan ddarparwyr fideo ar-alw ar waith, i asesu a ydynt yn ddigonol i ddiogelu cynulleidfaoedd rhag niwed.

Adroddiad
Ch2 2025/26

Rhan 4b: Cod safonau fideo ar-alw y gwasanaeth rhaglenni ar-alw a chod hygyrchedd fideo ar-alw. Yn amodol ar benderfyniad yr Ysgrifennydd Gwladol ar ddarparwyr Haen 1 dynodedig, byddwn yn ymgynghori ar god fideo ar-alw arfaethedig ac ar gyflwyno gofynion hygyrchedd ar gyfer gwasanaethau fideo ar-alw o fewn y cwmpas.

Ymgynghoriad
Ch2 2025/26
Datganiad
Ch3 2025/26

Rhan 5: Rheoleiddio Radio'r Ddeddf Cyfryngau. Byddwn yn cyhoeddi ein datganiad ar weithredu'r newidiadau sy'n ofynnol gan y Ddeddf Cyfryngau, yn enwedig gofynion gwybodaeth a newyddion lleol newydd ar gyfer radio masnachol lleol, yn ogystal â gofynion newydd ar gyfer amblecsau radio digidol. Byddwn yn amrywio trwyddedau yn unol â hynny.

Datganiad
Ch1 2025/26

Rhan 6: Cynorthwywyr llais y Ddeddf Cyfryngau. Byddwn yn rhoi gwybod i'r Ysgrifennydd Gwladol ynghylch pa wasanaethau dewis radio y dylid eu dynodi yn Ch1 2025/26. Byddwn wedyn yn rhoi proses ar waith ar gyfer gwasanaethau radio'r rhyngwyd i roi gwybod i ni er mwyn cael budd o'r ddeddfwriaeth. **Byddwn yn ymgynghori ar god ymarfer ar gyfer gwasanaethau dewis radio unwaith y bydd yr Ysgrifennydd Gwladol wedi dynodi gwasanaethau perthnasol.**

Adroddiad
Ch1 2025/26
Ymgynghoriad
Ch4 2025/26

Adolygiad o Gyfryngau Gwasanaeth Cyhoeddus. Ar ôl cyhoeddi ein hadolygiad o berfformiad darlledu gwasanaeth cyhoeddus yn y gorffennol a heriau cyfryngau gwasanaeth cyhoeddus yn y dyfodol yn 2024/25, byddwn yn ymgysylltu â rhanddeiliaid ac yn cyhoeddi ein canfyddiadau ar sut mae cryfhau'r ddarpariaeth o gynnwys cyfryngau gwasanaeth cyhoeddus yn y dyfodol erbyn diwedd Ch2 2025/26.

Adroddiad
Ch2 2025/26

Monitro perfformiad y BBC. Byddwn yn nodi sut rydym wedi cyflawni ein dyletswyddau ac yn asesu cydymffurfiaeth y BBC â'r gofynion penodol yn y Cytundeb Fframwaith, y Fframwaith Gweithredu ac o dan y Drwydded Weithredu. Byddwn hefyd yn cyhoeddi ein hadroddiad blynyddol ar berfformiad y BBC ar draws ein cyfrifoldebau, yn cynnwys cyflawni ei Genhadaeth a'i Ddibenion Cyhoeddus ar draws ei wasanaethau cyhoeddus wrth iddo newid i ddiwallu anghenion cynulleidfaoedd.

Adroddiad
Ch3 2025/26

Manylion y Prosiect

Cerrig Milltir

Adolygiad Cyfnodol y BBC. Mae'n rhaid i Ofcom gwblhau ail Adolygiad Cyfnodol cyn i Siarter y BBC ddod i ben ym mis Rhagfyr 2027. Byddwn yn adolygu perfformiad a pherthnasedd y BBC i gynulleidfaoedd y DU ac yn disgwyl adolygu agweddau ar reoleiddio'r BBC i sicrhau ei fod yn addas i'r diben.

Adroddiad
Ch4 2025/26

Canllawiau cystadleuaeth Adolygiad Canol Tymor y BBC. Yn amodol ar gwblhau'r Cytundeb Fframwaith newydd rhwng yr Adran dros Dechnoleg Ddigidol, Diwylliant, y Cyfryngau a Chwaraeon a'r BBC, byddwn yn diweddarau ein canllawiau ar asesu newidiadau i wasanaethau'r BBC.

Datganiad
Ch1 2025/6

Cod Deunydd Ar-lein y BBC. Byddwn yn darparu Cod Deunydd Ar-lein y BBC sy'n adlewyrchu egwyddorion yr Amcanion Safonau sy'n sail i'r Cod Darlledu. Byddwn yn ymgynghori ar y Cod ac yn gweithredu rheolau newydd o fewn 12 mis i gyhoeddi'r Cytundeb Fframwaith diwygiedig.

Datganiad
Ch2 2025/6

Sain BBC. Byddwn yn cynnal asesiad o Brofion Budd y Cyhoedd y BBC ar bedair gorsaf newydd arfaethedig DAB+ y BBC a newidiadau i BBC Radio 5 Sports Extra.

Datganiad
Ch2 2025/26

Datganiad Polisi Cynnwys Cyfryngau C4C. Byddwn yn cyhoeddi ein hymateb i Ddatganiad Polisi Cynnwys Cyfryngau Corfforaeth Channel 4 ar ei gynlluniau i gyflawni ei gylch gwaith a'i ddyletswyddau cynnwys cyfryngau.

Adroddiad
Ch2 2025/26

Adolygiad o Ganllawiau'r Cod. Rydym yn bwriadu cyhoeddi ein canllawiau diwygiedig ar y Cod Darlledu ochr yn ochr â'r datganiad terfynol ar y Cod Fideo Ar-alw.

Cyhoeddi
Ch3 2025/26

Proses adnewyddu teledu lleol. Cafodd deddfwriaeth newydd a oedd yn rhoi'r pŵer i ni gwblhau'r broses adnewyddu rhwng mis Mawrth a mis Tachwedd 2025 ei chyflwyno gerbron y Senedd ym mis Tachwedd 2024.

Datganiad
Ch3 2025/26

Adolygiad o Weithdrefnau Cyffredinol. Byddwn yn cyhoeddi ein datganiad ar newidiadau i'r gweithdrefnau cyffredinol ar gyfer ymchwilio i achosion o dorri amodau trwyddedau darlledu.

Datganiad
Ch2 2025/26

Monitro hygyrchedd Gwasanaeth Rhaglenni Ar-alw. Byddwn yn parhau i fonitro hygyrchedd gwasanaeth rhaglenni ar-alw a byddwn yn cyhoeddi ein hadroddiad blynyddol (yn amodol ar amseru mewn perthynas ag ymgynghoriad ar God hygyrchedd gwasanaeth rhaglenni ar-alw).

Adroddiad
Ch1 2025/26

Amrywiaeth wrth fonitro ac adrodd ar ddarlledu. Ochr yn ochr ag ymgysylltu parhaus â rhanddeiliaid, byddwn yn parhau i gasglu data blynyddol ar gyfer ein hadroddiad ar amrywiaeth gweithluoedd darlledwyr.

Adroddiad
Ch3 2025/26

Hysbysebu Bwydydd Llai Iach. Mae cyfyngiadau ar hysbysebu bwyd llai iach a chynhyrchion diod yn dod i rym yn Ch3 2025/26. Byddwn yn gweithio gyda'r Awdurdod Safonau Hysbysebu wrth iddi baratoi i weithredu a gorfodi.

Parhaus

Cyfryngau'r Genedl. Byddwn yn cyhoeddi ein hadroddiad blynyddol ar dueddiadau allweddol yn y sector teledu, fideo, radio a sain, sydd hefyd yn cynnwys fersiwn ar gyfer pob un o wledydd y Deyrnas Unedig.

Adroddiad
Ch2 2025/26

Rydyn ni'n byw bywyd mwy diogel ar-lein

Manylion y Prosiect	Cerrig Milltir
<p>Mynd i'r afael â chynnwys anghyfreithlon ar-lein. Ar ôl i'r Cod Ymarfer ar Gynnwys Anghyfreithlon gael ei gymeradwyo gan y Senedd, byddwn yn ymgynghori ar gynigion pellach i gryfhau ein Codau ar y niwed mwyaf sylweddol ar-lein, a fydd yn ychwanegu mesurau ychwanegol at y waelodlin a sefydlwyd yn ein Codau cyntaf.</p>	<p>Ymgynghoriad Ch1 2025/26</p>
<p>Amddiffyn Plant. Byddwn yn cyhoeddi ein Codau Ymarfer Amddiffyn Plant a'n canllawiau asesu risg, gan nodi sut dylai gwasanaethau fynd i'r afael â'u dyletswyddau newydd sy'n ymwneud â chynnwys sy'n niweidiol i blant.</p>	<p>Datganiad Ch1 2025/26</p>
<p>Gwirio oedran ar gyfer darparwyr pornograffi. Yn Ch4 2024/25 byddwn yn cyhoeddi ein canllawiau terfynol ar ddilysu oedran ar gyfer darparwyr pornograffi, ochr yn ochr â'n canllawiau ar Asesiadau Mynediad i Blant. Yn amodol ar brosesau Seneddol, rydym yn disgwyl y bydd modd gorfodi'r dyletswyddau sicrhau oedran hyn o Ch4 2024/25 ymlaen a byddwn yn dechrau monitro cydymffurfiad.</p>	<p>Parhaus</p>
<p>Trais yn erbyn Menywod a Merched. Rydym yn ymgynghori ym mis Chwefror 2025 a byddwn yn cwblhau ein canllawiau arfer gorau yn ddiweddarach yn 2025, sy'n canolbwyntio ar y cynnwys a'r gweithgarwch sy'n effeithio'n anghymesur ar fenywod a merched.</p>	<p>Parhaus</p>
<p>Dyletswyddau ar wasanaethau wedi'u categorio. Ar yr amod bod yr is-ddeddfwriaeth angenrheidiol yn cael ei phasio gan y Senedd, byddwn yn cyhoeddi cofrestr o wasanaethau wedi'u categorio ac yn cyhoeddi hysbysiadau tryloywder drafft i wasanaethau, gan nodi gofynion ar gyfer adroddiadau tryloywder. Byddwn hefyd yn ymgynghori ar Godau Ymarfer drafft a chanllawiau drafft ar ddyletswyddau ychwanegol ar wasanaethau wedi'u categorio.</p>	<p>Cyhoeddiad Ch2 2025/26 Ymgynghoriad Ch4 2025/26</p>
<p>Safonau cywirdeb sylfaenol ar gyfer technolegau achrededig. Gan ystyried yr ymatebion i'n hymgyngoriad, byddwn yn ceisio cwblhau ein cyngor i'r Ysgrifennydd Gwladol ar safonau sylfaenol o ran cywirdeb wrth ganfod cynnwys o derfysgaeth a cham-fanteisio'n rhywiol ar blant. Byddwn yn cyhoeddi canllawiau ar gyfer darparwyr gwasanaethau Rhan 3 ynghylch sut rydym yn bwriadu arfer ein pŵer newydd i gyhoeddi hysbysiadau i ddelio â chynnwys cam-fanteisio'n rhywiol ar blant/terfysgaeth o dan Bennod 5 o Ran 7 o'r Ddeddf Diogelwch Ar-lein.</p>	<p>Parhaus</p>
<p>Rhaglen Llwyfannau Rhannu Fideos. Mae Llywodraeth y DU wedi rhoi gwybod i Llwyfannau Rhannu Fideos am ei bwriad i ddiddymu'r drefn. Bydd Ofcom yn cefnogi darparwyr Llwyfannau Rhannu Fideos i symud i'r drefn diogelwch ar-lein ac yn llunio adroddiad diwedd y drefn ar ôl diddymu.</p>	<p>Adroddiad Ch3 2025/26</p>

Manylion y Prosiect	Cerrig Milltir
Goruchwyliaeth. Byddwn yn parhau i ymgysylltu â gwasanaethau dethol. Mae'r trosolwg hwn wedi'i dargedu yn cynnwys deall mesurau gwasanaethau'n fanwl, asesu pa mor dda maen nhw'n diogelu defnyddwyr, a gwthio am welliannau amserol lle bo angen.	Adroddiad Ch3 2025/26
Ffioedd. Bydd y drefn diogelwch ar-lein yn cael ei hariannu gan ffioedd a delir gan ddarparwyr gwasanaethau sy'n cael eu rheoleiddio y mae eu refeniw byd-eang cymwys yn cyrraedd neu'n rhagori ar drothwy penodol, ac nad ydynt wedi'u heithrio fel arall. Byddwn yn cyflwyno ein cyngor i'r Ysgrifennydd Gwladol ar y trothwy Refeniw Byd-eang Cymwys yn Ch1 2025/26.	Parhaus
Uwch-gwynion. Mae DSIT wedi ymgynghori ar y meini prawf cymhwysedd ar gyfer endidau i wneud uwch-gŵyn o dan adran 169 y Ddeddf Diogelwch Ar-lein; meini prawf sy'n gwneud uwch-gŵyn yn dderbyniol, a gweithdrefnau ar gyfer gwneud uwch-gŵyn. Bydd yr Ysgrifennydd Gwladol yn cwblhau'r meini prawf hyn mewn is-ddeddfwriaeth, ac ar ôl hynny bydd Ofcom yn ymgynghori ar ganllawiau ynghylch uwch-gwynion.	Ymgynghoriad Ch1 2025/26
Gorfodi. Erbyn diwedd Ch4 2025/26 bydd dyletswyddau sy'n ymwneud â niwed anghyfreithlon, amddiffyn plant a sicrhau oedran i gyd mewn grym. Byddwn yn monitro cydymffuriad a phan welwn fethiannau clir a chyson o ran cydymffurfio â'r dyletswyddau hyn, byddwn yn edrych ar ddefnyddio ein pwerau gorfodi i weithredu.	Parhaus
Ein Gwlad Ar-lein. Byddwn yn cyhoeddi ein hadroddiad blynyddol ynghylch beth mae pobl yn ei wneud ar-lein, eu hagweddau tuag at ddefnyddio'r rhyngwrdd a'u profiadau o hynny.	Adroddiad Ch3 2025/26

Galluogi gwasanaethau di-wifr yn economi'r DU

Manylion y Prosiect	Cerrig Milltir
Dyfarnu trwyddedau sbectrwm mmwave (26 a 40 GHz). Rydyn ni'n bwriadu agor ceisiadau ar gyfer arwerthu trwyddedau sbectrwm mmWave mewn ardaloedd dwysedd uchel ac rydyn ni'n bwriadu rhoi trwyddedau i ddefnyddio'r sbectrwm ar gyfer gwasanaethau symudol yn Ch1 2025/26.	Arwerthiant Sbectrwm Ch1 2025/26
Galluogi mynediad i 1.4 GHz. Byddwn yn penderfynu ar ddyluniad arwerthiant y sbectrwm 1.4 GHz ychwanegol ar gyfer defnydd symudol.	Datganiad Ch2 2025/26
Defnyddio'r 6 GHz uchaf yn y dyfodol. Rydym yn edrych ar opsiynau i sicrhau bod y band 6 GHz uchaf ar gael ar gyfer gwasanaethau ychwanegol gan ystyried datblygiadau rhyngwladol. Byddwn hefyd yn ystyried defnyddiau ychwanegol ar gyfer y band 6 GHz is.	Datganiad Ch3 2025/26

Galluogi mynediad i 1900 MHz. Byddwn yn cyhoeddi datganiad mewn perthynas â'r rheolau defnyddio a thrwyddedu sbectrwm 1900 MHz ar ôl cwblhau ein hymgyngoriad yn 2024/25 ar gyfer defnyddwyr seilwaith cenedlaethol, fel cyfathrebu diogelwch rheilffyrdd a gwasanaethau brys.

Datganiad
Ch1 2025/26

Ehangu mynediad sbectrwm ar gyfer pyrth lloeren. Byddwn yn penderfynu ar ein dull gweithredu, ar ôl ymgynghori, i sicrhau bod sbectrwm ychwanegol ar gael ar gyfer defnydd o'r pyrth lloeren mewn bandiau Q/V ac E er mwyn diwallu'r galw cynyddol am gysylltedd lloeren.

Datganiad
Ch2 2025/26

Ehangu mynediad sbectrwm ar gyfer cysylltedd lloeren awyrenegol a morol. Byddwn yn ymgynghori ar ehangu mynediad sbectrwm ar gyfer gwasanaethau lloeren awyrenegol a morol ym mand Ku a Ka, gan weithredu penderfyniadau WRC-23. Byddai hyn yn darparu capasiti ychwanegol ar gyfer darparu gwasanaethau band eang lloeren ar gyfer llongau ac awyrennau.

Ymgynghoriad
Ch2 2025/26
Datganiad
Ch4 2025/26

Diweddarau ein fframwaith awdurdodi lloeren. Rydym yn adolygu ein fframwaith trwyddedu NGSO (a gyflwynwyd yn 2021) a'n polisi ffioedd trwyddedau porth lloeren. Byddwn hefyd yn diweddarau ein Gweithdrefnau ar gyfer Rheoli Ffeilio Lloerennau, gan weithredu penderfyniadau WRC-19 a WRC-23.

Cyhoeddi
trwyddedau
NGSO
Ch1 2025/26
Cyhoeddi Ffioedd
Trwyddedau
Porth
Ch2 2025/26
Ymgynghoriad ar
Reoli Ffeilio
Lloerennau
Ch2 2025/26

Fframwaith rheoleiddio ar gyfer cysylltiad uniongyrchol rhwng lloeren a ffôn symudol. Byddwn yn ymgynghori ar roi fframwaith rheoleiddio yn ei le i alluogi bod gwasanaethau lloeren yn cyrraedd ffonau symudol yn uniongyrchol, lle mae cytundeb rhwng lloeren a gweithredwyr symudol. Gallai hyn ymestyn darpariaeth symudol a darparu cadernid i rwydweithiau symudol daearol mewn sefyllfaedd o argyfwng a thrychineb.

Datganiad
Ch2 2025/26

Symleiddio a diweddarau trwyddedau morol. Byddwn yn ymgynghori ar gynigion i ddiweddarau rhai o'n trwyddedau morol i weithredu penderfyniadau WRC a symleiddio telerau ac amodau trwyddedau.

Ymgynghoriad
Ch3 2025/26

Adolygu ffioedd trwydded sbectrwm symudol. Rydym yn adolygu'r ffioedd trwydded blynyddol rydym yn eu codi am drwyddedau sbectrwm symudol 900, 1800 a 2100 MHz, ar ôl ystyried y cais gan BT.

Datganiad
Ch2 2025/26

Prosiectau trawsbynciol

Manylion y Prosiect	Cerrig Milltir
Ymwybyddiaeth o'r cyfryngau. Byddwn yn cyhoeddi ein datganiad o argymhellion i helpu llwyfannau a darlledwyr ddarparu gwell cymorth ymwybyddiaeth o'r cyfryngau i'w defnyddwyr, mwy o werthuso effeithiolrwydd y cymorth hwnnw, a chyllid tymor hirach ar gyfer mentrau ymwybyddiaeth o'r cyfryngau.	Datganiad Ch2 2025/26
Adrodd ar ymwybyddiaeth oedolion o'r cyfryngau. Byddwn yn cyhoeddi ein hadroddiad blynyddol ar Agweddau Oedolion a'u Defnydd o Gyfryngau, gan edrych ar ymwybyddiaeth o'r cyfryngau ymysg oedolion y Deyrnas Unedig. Ochr yn ochr â hyn, byddwn yn cyhoeddi ein hadroddiad blynyddol ar y Cyfryngau ym Mywyd Oedolion, gan roi manylion canfyddiadau ein gwaith ymchwil hydredol, ethnograffig ar raddfa fach.	Adroddiad Ch1 2025/26
Adrodd ar ymwybyddiaeth plant o'r cyfryngau. Byddwn yn cyhoeddi ein hadroddiad blynyddol ar Agweddau Plant a'u Defnydd o Gyfryngau, yn ogystal â'n hadroddiad ar y Cyfryngau ym Mywyd Plant, gan roi manylion canfyddiadau ein gwaith ymchwil hydredol, ethnograffig, ansoddol ar raddfa fach ymysg plant a phobl ifanc.	Adroddiad Ch1 2025/26
Adroddiad ar gael gafael ar newyddion. Byddwn yn cyhoeddi ein hymchwil flynyddol i'r ffordd mae pobl yn defnyddio ac yn meddwl am wasanaethau newyddion ar y teledu, ar y radio, mewn print ac ar-lein.	Adroddiad Ch2 2025/26
Marchnadoedd digidol. Byddwn yn parhau i ystyried sut mae cystadleuaeth ddigidol a materion defnyddwyr yn effeithio ar y sectorau rydym yn eu rheoleiddio a'r ffordd orau o ymateb, gan gynnwys drwy gydweithio â'r Awdurdod Cystadleuaeth a Marchnadoedd / Uned Marchnadoedd Digidol.	Parhaus

A3. Aseiad effaith

Mae aseidiadau effaith yn rhoi gwerthusiad gwerthfawr i'n rhanddeiliaid o'r opsiynau sy'n cael eu hystyried wrth wneud penderfyniadau polisi a dangos pam mae'r opsiwn a ddewiswyd yn cael ei ffafrio. Maent yn rhan o'r broses o lunio polisi ar sail yr arferion gorau ac arferion rheoleiddio. Adlewyrchir hyn yn adran 7 o'r Ddeddf Cyfathrebiadau, sy'n mynnu bod Ofcom yn cynnal ac yn cyhoeddi aseidiadau effaith mewn achosion lle byddai gweithredu cynnig yn debygol o gael effaith arwyddocaol ar fusnesau neu'r cyhoedd, neu lle mae newid mawr yng ngweithgareddau Ofcom.

Rydym yn cydnabod bod y penderfyniadau rydym ni'n eu gwneud yn gallu sicrhau gwerth sylweddol i ddinasyddion ac i ddefnyddwyr, ond eu bod hefyd yn gallu arwain at gostau sylweddol i'n rhanddeiliaid. Felly, mae Ofcom yn cynnal aseidiadau effaith mewn mwyafrif helaeth o benderfyniadau polisi, i ystyried a yw ein hymyriadau polisi yn gymesur ac yn briodol.

Yn achos y cynigion ar gyfer Cynllun Gwaith 2025/26, nid ydym wedi cynnal aseiad effaith gan fod pob polisi a'r holl gyhoeddiadau a rhaglenni gwaith cysylltiedig a gynhwysir yn y Cynllun yn cael eu hasesu'n unigol fel y bo'n briodol.

A4. Ymateb i'r ymgynghoriad hwn

Sut mae ymateb

- A4.1 Byddai Ofcom yn hoffi derbyn safbwyntiau a sylwadau ynghylch y materion sydd wedi'u codi yn y ddogfen hon erbyn 5pm ar 29 Ionawr 2025.
- A4.2 Gallwch lwytho ffurflen ymateb i lawr yn <https://www.ofcom.org.uk/consultations-and-statements/category-2/ofcoms-proposed-plan-of-work-2024-25>. Gallwch ddychwelyd y ffurflen dros e-bost neu drwy'r post i'r cyfeiriad sydd ar y ffurflen ymateb.
- A4.3 Os yw eich ymateb yn ffeil fawr, neu os yw'n cynnwys siartiau, tablau neu ddata ategol eraill, a fydddech chi cystal â'i anfon dros e-bost at planofwork@ofcom.org.uk, fel atodiad mewn fformat Microsoft Word, ynghyd â'r ddalen gyflwyno. At ddibenion yr ymgynghoriad hwn yn unig y mae'r cyfeiriad e-bost hwn, ac ni fydd yn gweithio ar ôl i'r ymgynghoriad ddod i ben.
- A4.4 Fel arall, gellir postio ymatebion i'r cyfeiriad isod, gan nodi teitl yr ymgynghoriad arnynt:
- Plan of Work Team
- Ofcom
- Riverside House 2A Southwark Bridge Road
- London SE1 9HA
- A4.5 Mae croeso i chi gyflwyno ymatebion mewn fformatau eraill heblaw mewn print, er enghraifft recordiad sain neu fideo mewn iaith Arwyddion Prydain. I ymateb drwy ddefnyddio iaith Arwyddion Prydain:
- Anfonwch recordiad ohonoch chi'n defnyddio'r iaith arwyddion i gyfleu eich ymateb. Ni ddylai'r recordiad bara am fwy na munudau. Dyma'r fformatau ffeil addas: ffeiliau DVD, wmv neu QuickTime; neu
 - Gwnewch fideo ohonoch chi'n defnyddio'r iaith arwyddion i gyfleu'ch ymateb, a'i lwytho yn syth i YouTube (neu safle cynnal arall), ac anfon y ddolen atom ni.
- A4.6 Byddwn yn cyhoeddi trawsgrifiad o unrhyw ymatebion sain neu fideo a gawn (oni bai fod eich ymateb yn gyfrinachol).
- A4.7 Nid oes angen i ni gael copi papur o'ch ymateb yn ogystal â fersiwn electronig. Byddwn yn cydnabod ein bod wedi derbyn ymateb a gyflwynir i ni dros e-bost.
- A4.8 Nid oes rhaid i chi ateb pob cwestiwn yn yr ymgynghoriad os nad oes gennych chi safbwynt; mae ymateb byr ar ddim ond un pwynt yn iawn. Rydym hefyd yn croesawu ymatebion ar y cyd.
- A4.9 Byddai o gymorth pe bai eich ymateb yn cynnwys cyfeiriad at yr adran a'r paragraff y mae'n cyfeirio atynt. Byddai'n ddefnyddiol hefyd pe bai modd i chi esbonio pam rydych chi'n arddel eich safbwyntiau, a beth fyddai effaith cynigion Ofcom yn eich barn chi.

- A4.10 Os hoffech chi drafod y materion a'r cwestiynau sydd wedi cael eu codi yn yr ymgynghoriad hwn, anfonwch e-bost i planofwork@ofcom.org.uk.

Cyfrinachedd

- A4.11 Mae ymgynghoriadau'n fwy effeithiol os ydym yn cyhoeddi'r ymatebion cyn i'r cyfnod ymgynghori ddod i ben. Gall hyn helpu pobl a sefydliadau sy'n brin eu hadnoddau neu sydd ddim yn gyfarwydd iawn â'r materion dan sylw i ymateb yn fwy gwybodus. Felly, er mwyn bod yn dryloyw a sicrhau ymarfer rheoleiddio da, ac oherwydd ein bod ni'n credu ei bod yn bwysig bod pawb sydd â diddordeb mewn mater yn gallu gweld safbwyntiau ymatebwyr eraill, fel rheol byddwn yn cyhoeddi ymatebion ar wefan Ofcom yn rheolaidd yn ystod y cyfnod ymgynghori ac ar ôl iddo ddod i ben.
- A4.12 Os ydych chi'n meddwl y dylid cadw eich ymateb yn gyfrinachol, a fydddech chi cystal â nodi i ba ran(nau) mae hyn yn berthnasol, ac egluro pam. Anfonwch unrhyw adrannau cyfrinachol fel atodiad ar wahân. Os ydych chi am i'ch enw, eich cyfeiriad, manylion cyswllt eraill, neu deitl eich swydd aros yn gyfrinachol, rhwch y manylion hynny ar y ddalen gyflwyno'n unig, fel na fydd rhaid i ni olygu eich ymateb.
- A4.13 Os bydd rhywun yn gofyn i ni gadw ymateb cyfan neu ran ohono yn gyfrinachol, byddwn yn trin y cais hwn o ddifri ac yn ceisio ei barchu. Ond weithiau bydd angen i ni gyhoeddi pob ymateb, gan gynnwys y rhai sydd wedi eu nodi'n rhai cyfrinachol, er mwyn bodloni rhwymedigaethau cyfreithiol.
- A4.14 Er mwyn cyflawni ein dyletswydd cyn datgelu, efallai y byddwn yn rhannu copi o'ch ymateb ag adran berthnasol yn y llywodraeth cyn i ni ei gyhoeddi ar ein gwefan.
- A4.15 Sylwch hefyd y cymerir bod yr hawlfraint a phob eiddo deallusol arall sydd mewn ymatebion wedi'u rhoi o dan drwydded i Ofcom eu defnyddio. Mae hawliau eiddo deallusol Ofcom yn cael eu hegluro ymhellach yn ein [Telerau Defnyddio - Ofcom](#).

Y camau nesaf

- A4.16 Ar ôl y cyfnod ymgynghori hwn, mae Ofcom yn bwriadu cyhoeddi datganiad fis Mawrth 2025.
- A4.17 Gallwch chi gofrestru i gael diweddariadau drwy'r post yn rhoi gwybod i chi am gyhoeddiadau newydd Ofcom os ydych yn dymuno hynny.

Prosesau ymgynghori Ofcom

- A4.18 Mae Ofcom yn ceisio sicrhau ei bod mor hawdd â phosibl ymateb i ymgynghoriad. I gael rhagor o wybodaeth, cymerwch gip ar ein hegwyddorion ymgynghori yn Atodiad 5.

A4.19 Os oes gennych chi unrhyw sylwadau neu awgrymiadau am y modd rydym yn rheoli ein hymgyngoriadau, anfonwch neges e-bost atom yn consult@ofcom.org.uk. Rydym wrth ein bodd o gael syniadau ynghylch sut gallai Ofcom ofyn yn fwy effeithiol am farn grwpiau neu unigolion, fel busnesau bach a defnyddwyr preswyl, sy'n llai tebygol o roi eu barn drwy ymgynghoriad ffurfiol.

A4.20 Os hoffech drafod y materion hyn, neu brosesau ymgynghori Ofcom yn fwy cyffredinol, cysylltwch ag ysgrifennydd y gorfforaeth:

Corporation Secretary

Ofcom

Riverside House 2a Southwark Bridge Road

London SE1 9HA

E-bost: corporationsecretary@ofcom.org.uk

A5. Egwyddorion ymgynghori Ofcom

Mae Ofcom yn dilyn saith egwyddor ar gyfer pob ymgynghoriad ysgrifenedig cyhoeddus:

Cyn yr ymgynghoriad

A5.1 Os oes modd, byddwn yn cynnal sgysiau anffurfiol gyda phobl a sefydliadau cyn cyhoeddi ymgynghoriad mawr i gael gwybod a ydym ar y trywydd iawn. Os nad oes gennym ddigon o amser i wneud hyn, byddwn yn cynnal cyfarfod agored i egluro ein cynigion yn fuan ar ôl cyhoeddi'r ymgynghoriad.

Yn ystod yr ymgynghoriad

A5.2 Byddwn yn glir ynghylch pwy rydym ni'n ymgynghori â nhw, pam, ar ba gwestiynau ac am ba hyd.

A5.3 Byddwn yn gwneud y ddogfen ymgynghori'n un mor fyr ac mor syml ag y bo modd gyda chrynodeb o ddim mwy na dwy dudalen. Byddwn yn ceisio ei gwneud mor hawdd â phosibl i bobl roi ymateb ysgrifenedig i ni.

A5.4 Byddwn yn ymgynghori am gyfnod o hyd at ddeg wythnos yn dibynnu ar effaith bosibl ein cynigion.

A5.5 Bydd rhywun yn Ofcom yn gyfrifol am sicrhau ein bod yn dilyn ein canllawiau ein hunain ac yn ceisio cyrraedd y nifer fwyaf o bobl a sefydliadau sydd â diddordeb o bosibl yng nghanlyniad ein penderfyniadau. Hyrwyddwr Ymgynghori Ofcom fydd y prif bwynt cyswllt os oes gennych chi farn am y modd rydym yn cynnal ein hymgyngoriadau.

A5.6 Os na fyddwn yn gallu dilyn unrhyw un o'r saith egwyddor hyn, byddwn yn egluro pam.

Ar ôl yr ymgynghoriad

A5.7 Credwn ei bod yn bwysig bod pawb sydd â diddordeb mewn mater yn gallu gweld safbwyntiau pobl eraill. Felly, fel rheol, byddwn yn cyhoeddi'r ymatebion yn rheolaidd yn ystod y cyfnod ymgynghori ac ar ôl iddo ddod i ben. Ar ôl yr ymgynghoriad, byddwn yn gwneud ein penderfyniadau ac yn cyhoeddi datganiad sy'n egluro beth fyddwn ni'n ei wneud, a pham, gan ddangos sut mae safbwyntiau ymatebwyr wedi helpu i lywio'r penderfyniadau hyn.

A6. Dalen gyflwyno'r ymgynghoriad

MANYLION SYLFAENOL

Teitl yr ymgynghoriad:

At (swyddog cyswllt yn Ofcom):

Enw'r ymatebydd:

Yn cynrychioli (eich hun neu sefydliad(au)):

Cyfeiriad (os na ddaeth i law drwy e-bost):

CYFRINACHEDD

Ticiwch isod i ddangos pa ran o'ch ymateb rydych chi'n ei hystyried yn gyfrinachol, a rhowch eich rhesymau dros hynny

- Dim
- Enw/manylion cyswllt/teitl swydd
- Ymateb cyfan
- Sefydliad
- Rhan o'r ymateb

Os ydych chi wedi dewis 'Rhan o'r ymateb', nodwch pa rannau:

Os ydych chi am i ran o'ch ymateb, eich enw neu eich sefydliad beidio â chael eu cyhoeddi, ydych chi'n fodlon i Ofcom gyhoeddi cyfeiriad at gynnwys eich ymateb (gan gynnwys, yn achos unrhyw rannau cyfrinachol, grynodedd cyffredinol na fydd yn datgelu'r wybodaeth benodol nac yn datgelu pwy ydych chi)?

Ydw Nac ydw

DATGANIAD

Rwy'n cadarnhau bod yr ohebiaeth sydd wedi'i rhoi gyda'r ddalen gyflwyno hon yn ymateb ffurfiol i'r ymgynghoriad y gall Ofcom ei gyhoeddi. Fodd bynnag, wrth ddarparu'r ymateb hwn, rwy'n deall ei bod yn bosib y bydd angen i Ofcom gyhoeddi'r holl ymatebion, gan gynnwys y rheini sydd wedi'u marcio'n gyfrinachol, er mwyn cyflawni rhwymedigaethau cyfreithiol. Os ydw i wedi anfon fy ymateb drwy neges e-bost, gall Ofcom ddiystyru unrhyw destun e-bost safonol ynglŷn â pheidio â datgelu cynnwys ac atodiadau'r neges e-bost.

Mae Ofcom yn bwriadu cyhoeddi ymatebion yn rheolaidd yn ystod y cyfnod ymgynghori ac ar ôl iddo ddod i ben. Os yw'ch ymateb yn un nad yw'n gyfrinachol (yn gyfan gwbl neu'n rhannol), ac y byddai'n well gennych i ni beidio â chyhoeddi'ch ymateb nes bydd yr ymgynghoriad wedi dod i ben, ticiwch yma

Enw

Llofnod (os darperir copi caled)